

KI MANI YO MELEKISEDEKE?

 Halu inamiseñi litoho zaluna kwa tapelo.

Ndate Yomunde ya kwa Lihalimu, lu utwa pina ye ya kuli *Lumela Feela*, ye lueza kuziba kuli sani kona se lu lukela fela kueza kwa ku fumana zeñwi kaufela za limbuyoti za Mulimu, ki ku li lumela fela. Kakuli ku ñozwi kuli, “Lika kaufela za konahala ku baba lumela.” Halunze lu huwa, sina muuna yana nani mwana wa kanono kuli, “Mulena, Na lumela! Tusa ku sa lumela kwa ka.”

2 Lu itumela ku Wena ka mata a Hao amatuna, sinulo ya Hao ye tuna yona yeo Wena kasibili ufile ku luna mwa mazazi a maungulo a. Li eza lipilu zaluna kutaba hahulu ni ku nyakalala, ka kuziba kuli lu tilo nongana ni Mulimu yapila; Yena ya lipaka kukutela mwa nama, bupaki bo bu swaliwa, sina mwa Na ezelize mwa mazazi a kwa mulaho, mi sina ha Na sepisize mwa lizazi le. Lu itumela hahulu ku Wena, Mulimu wa luna. Ona lizazi leli unsufezi le ko ku sa bonahali mutu ya ziba nzila ya kuya ka yona, lu tabile hahulu kuli lu fumani sibaka sa masabelo, kwa kumatela.

3 Cwale ulufuyaule busihu boo, Mulena, halunze lu ambola fa Linzwi la Hao. Ni lisepiso ze filwe ku luna, lu li huliseze mwa lipilu za luna, ku li buluka ka likute, ni ku li utwela ka likute la bumulimu luli. Kakuli lwa li kupa ka Libizo la Jesu. Amen.

4 [Yomuñwi uambola ku Muzwale Branham—Mu.] (Oh, sani ha si lukeli kuezwa. Nubu ya lilato? Haba lukeli. Ne ba sa swaneli kueza sani. Ki mañi ya ezize seo? Muna ni mulatu?) Ne ni teeleza ku muina sipula. Na bulezzi kuli nani ngezi nubu ya lilato. Na sa swaneli kueza cwalo. Na itumela ka yona, Mulimu wa ziba cwalo, kono Hani—Hani tahelangi zani. Ni itumezi. Mi Mulena ami fuyole. Ni ka eza lika kaufela ze Ni kona. Ni ka ibeya fela mwa misebezi ya kwa buse bwa naha, kakuli Ni ziba kuli ikaya kwa Mubuso wa Mulimu. Mi haiba Mulena alata, Ni ka i amuhela, na kasibili, kuisa kwa libaka zani, ku yo tisa ona Evangelie ye swana ye muinzi, ku teeleza mwa biki ye, konakuli Ni ziba kuli li ka eزوا mwa nzila ye mu lumezi ku Yona. Mulena ani tuse kueza cwalo.

5 Ni itumezi hahulu ka ku kopana ko kutuna biki ye, ni ku mina sicaba kaufela baba lu teeleza busihu bwa kacenu hape ka—ka mihala ya luwaile. Mi lwa itumela ku mañi ni mañi wa mina.

6 Billy uize ku na kakusasana wo, na bulezzi kuli, “Tate, kambe ne mu ka taha nina kakusasana cwana, ka ku itahanelia, li sa pazula fela, ni kuyema mwa libaka ze kubona ba hame ha ba anyisa limbututu za bona mwa mota, batu baba shebile bani

bali kuina mwa pula cwalo, ba libelezi kuli minyako ikwaluhe!" Ne mu ka bona muipi yo Ni li yena kuli kambe Ni kile na mi bulelela sika kaufela kwanda Niti? Kaniti ne ni kaba mutu ya fosahalile. Fokuñwi Ni na ni ku holofaza, kono ha ki kuli Ni bata kueza cwalo, kono kikuli . . . Ha ki na ya sweli ku holofaza. Ki Niti ye holofaza. Mi Ni—Ni . . . Kono Ni lumela kuli libaka le mu tahelanga, kakuli Ni sepahala hahulu ku mina, mi ni eza kaufela zeo Ni kona ku mitusa. Mulena ami tuse mañi ni mañi wa mina.

⁷ Mi cwale Ni bata ku itumela kwa sicaba ka ku utwana kwa bona kokunde, ona sicaba sa mwa muleneñi mo, hape, baba lu file, ku lukulula kuli lu lifelange ndu ya sikolo ye, ona muyaho wo ni sibaka sa lipapali za kutisa mibili. Mi Ni bata ku itumela kwa bayemeli haiba muteni mwahali mo. Mi hape Ni bata ku itumela ku Thurston Colvin, yena mubabaleli wa kwanu, ka kutwisiso ya hae yende ka ku lutusa kuba ni sona ni kuba ni luna busihu ni busihu.

⁸ Lu itumela kwa mapokola ba Jeffersonville ka kutaha kwanu ku to sileleza, ka tifo ye likani ye cipile luli. Ni sepa ki madollar amabeli ka hola, kona ao mapokola ba beilwe kwanu kwa musebezi omunde wani, ku pakica limota, kubona kuli hakuna . . . sika se si ezahala, mi lika kaufela libe fela hande. Lu itumela kwa sicaba ka zeo. Mi haili ku—ku, ni yena, mucaindisi kwanu mwa—mwa katengo, Ni mu lemuhibile. Ni bao kaufela baba swalisan ni yena, lu itumela hahulu ku mina.

⁹ Ni itumela ku mutu ni mutu wa mina ka limpo. Billy u ni tiselize fela, musihali wo, ona—ona mpo, mane ze ñata nyana, ni tu putumende, tuswiti, ni zeñwi cwalo. Mi yeñwi ya zona neli—neli ya Limbuyoti, ni siswaniso sa Kreste si beilwe mwa—mwa teni, kaza Tuto fa Lilundu. Mi kaniti neli se sinde luli. Kaniti na itumela ku mina. Ni lika zeñata hahulu, Hani zibi mwa mo ni kona ku itumela ku mina. Cwale, hape, kwa—kwa lituso za mina, za kulifela mukopano, kaniti lwa itumela ka zona, ka lipilu za luna kaufela. Mulena afuyaule mutu ni mutu wa mina, ka kutala.

¹⁰ Billy naize, ne kuna ni batu babañata, bene ba kupa ku ambolisana ka litaba za kwa mukunda mwa nako ye. Mi babañata ba kupile mi neba nani limbututu ze nyinyani kuli li neelwe. Oh, mo Ni batela kueza cwalo!

Kono, mwa bona, ha Ni taha ka nako ye, ki kuakufa hahulu. Ni lukela kuina hande, ka nako kaufela, mwa kubala ka tokomelo, Linzwi le ni litapelo, ka kutisa Mañusa aa. Mwabona, ha ki . . . Ki a—ki a ipitezi ku luna, kakuli ki ku fumana tato ya Mulimu ni kubulela litaba za teni. Ni zeo kaufela ze lukela ku kopana hamoho, ni ku kupa ku Mulimu kuli ki ifi fela ye lukela ku kwalulwa.

¹¹ Cwale, haiba Mulena alata, lu ka kuta hape cwanoñu fa, lu sa fumana fela lizazi. Ni bulezi ta—ta taba yeñwi, kamba—kamba ku bulela taba yeñwi ka za Paseka. Ni lukela ku tatuba

sani, kakuli Ni sepa kuli Ni na ni mukoloko wa musebezi mwa California ni mona ka nako yani. Konakuli sani sa kona ku fosahala. Konohe, ha lu ka kuta hape mwa tabernakele, lu ka mi lumela kadi, ni keleke, ni—ni ku mifa li—li lizazi ni nako. Mi Ni ka, mwendi ka nako yani, hape . . .

¹² Hani si ka beya nako ya ku lapelela bakuli. Ha lu si ka toma sebelezo yelukile lwa tisa sicaba ni ku si lapelela. Lu bile lu ba lumela kwande. Mi mizwale ya luna kwanu ibile i kutaza, Muzwale Lee Vayle ni Muzwale . . . Ona mizwale babañwi baba bile ba kutazanga, ni ku lapelela bakuli, ni kueza kolobezo ya mezi, ku kolobeza, nitaluse, ni ku ni tuhela kuli ni talimane fela ni Linzwi. Lwa itumela kwa baana ba. Ba ezize musebezi omunde.

¹³ Kuna ni balikani babañata hahulu mo bo Ni tabela ku kopana ni bona. Hani talima ni bona John ni Earl. Mi ki yani fani Muluti Lee Vayle, alimuñwi wa baokameli ba mikopano. Muzwale Roy Borders. Baana bani, Na mane ha ni si kaba ni . . . Ha ni si ka swalana mwa mazoho abona. Ha ni si kaba ni kolo yecwalo. Ni nahana ka balikani baka ba kwa Kentucky, ni mwa sibaka sa kwanu, ni balikani ba bakutazi, kamo Ni tabelela ku swalana mwa mazoho ni bona! Muzwale Blair, Ne ni mu lemuhile kwanu zazi leliñwi. Mi buñata bwa baana bani be Ni—Ni lata, mi ba bile kwa mikopano ye miñata nyana, mi ha Ni sika bona zeñwi ka mukwa wa ku itumelisa ka mazoho ni bona. Ni—Ni lika . . . Ha ki kuli ha Ni lati kueza sani; kikuli ha Ni na nako ya kueza cwalo, mi Ni akufa hahulu.

¹⁴ Ku neela limbututu, luli. Mwana ka wa mushimani, muikulyange wa mushimani na lukela ku neelwa mwa mukopano wo. Ha nina nako ya kueza cwalo; David yomunyinyani. Se nili kuku, habeli cwale. Kacwalo, Bo May, haiba nji bateni mo busihu bo, bene ba ni file mushwati wani, ku bonahala kuli Ni ka itusisa ona cwanoñu nyana fa.

¹⁵ Kacwalo, mi Na bulelala Billy, Na li, “Bibebe ibulezi kuli ‘muekezehe mi mutaze lifasi,’ kono mutiyo wo kaufela no si ka fiwa ku wena unosi.” Kakuli baikulu ba basweli ku shokomoka ka lubilo lolutuna.

Mi kacwalo, muhupule, mukwenyana ka wa musali neli muumba, ka kukala. Na sa koni kuba ni bana. Mi zazi leliñwi, fa kuzwa mwa mukopano, Mulena abulela ku na mi ali, “Loyce, uka pepa mwana mushimani. Mulena uku fuyozi. Butata bwa hao bwa sisali bu felile.” Paul yomunyinyani a pepwa, likweli ze ketalizoho ka zene kasamulaho.

¹⁶ Likweli zepeli mbututu yo asika bonahala kale, Ne ni ikinezi, inze ni ca mukushuko kakusasana omuñwi, fa tafule, mi Loyce ni Billy ne ba inzi mwa buse bwa tafule kuzwa ku na. Mi Na bona Loyce inza sweli ku anyisa mbututu yenyinyani mwa mubala wa pinki . . . kamba kubo ya mubala wa lihalimu inze

iputaputezwi mwateni. Mi Billy na inzi mwa lilulu, inza cisa Paul yomunyinyani. Se nili, “Billy, Ni boni pono cwanoñu nyana fa. Loyce na sweli kucisa mbututu ye apesizwe mwa kubo ya mubala wa lihalimu.”

Ki hali, “Ki wani musipili waka wa kuzuma. Ki likweli fela ze ketalizoho kuzwa cwale.”

Likweli ze lishumi ka ilinwi mwa mulaho, David yomunyinyani a pepwa. Mi Ha ni si ka kona ku mu neela ku Mulena niteni, mi hanina kueza cwalo kufitela ha lu ka kuta hape. Kacwalo mwa bona seo sili sona.

¹⁷ Mo Ni latela batu ni liputeho za bona! Kono mizwale ba luna babile ba lapelela bakuli, mi Na ziba ki punyuho. Busihu ni busihu ha lu lapelela bakuli, alimuñwi ubeya mazoho ku yomuñwi, kaufela luna hamoho, ili mane ka nzila yeo muswala silundwamanje kaufela. Kono mwendi, haiba nji Mulimu alata.... Ni ka iñola fa kadi, haiba lu ka i luma. Ha lu ka kuta, Ni ka tabela ku neela mazazi amabeli kamba amalalu, hape, ka ku lapelela fela bakuli ni kueza se lukona ka mukwa ona wani. Cwale, mi Na itumela sicaba kwa tuso ya sona, hape.

¹⁸ Cwale Ni bata fela kubulela cwana, fa nako nyana, fa—fa Liñusa la kakusasana. Hakuna ku kakanya, Hanina ku lifeza handende, kono Ni sepa mwa utwisisa. Mi Na sepa ne mu si ka.... Hamuna kuziba sene sili sona kuli ni eze.

¹⁹ Cwale, si bonahala bunolo hahulu ku mina. Kono, mina, mwa bona se mu sweli kueza? Munga sibaka sa Mulimu, fa kubulela Sika. Mi Ni si ka eza kale seo, ku lukela kutaha kalabo yezwa ku Mulimu. Mi Na nani kutaha fafasi, mi A iponahaza patala Iliyena, mi afa Sinulo. Kabakaleo, mwabona, se ki sa kwa Keleke. Mi muhupule, Se nili, “Ba, se Ni bulezi, neli sa kwa Keleke fela.”

²⁰ Mi ili kuli mube ni sepo ni kuziba, kuli yani ki Mulimu ya swana yana bulezi ku na kwani hane kusina tumale. “Bulela, mi ubulele fo tu kaba.” Mi linako zetalu ze namile kwaba ona cwalo. Cwale, haiba nji Wa kona ka Linzwi le li swana lani ku bupa sika se si siyo, kana ku cwani he ka Se mo si ka swalela ka kutiya ka Lizazi la Katulo! Mwabona? Batu nebali teni kwani kuli ba bone lika ze, ni kuziba. Sina Paulusi hana ize, mwa mazazi a kwa mulaho. Kuna ni baana hamoho ni yena, bene—bene ba utwile lifasi halii nyungana; kono ne ba si ka utwa linzwi, kono neba—neba boni fela—fela Siita sa Mulilo.

²¹ Ne si ni ezize hande, niteni, kasamulaho simano fela; ku bona baana ni basali ba bona, bao Ni ziba kuli ki Bakreste ba niti, banze ba kumbatelana ni kulila.

²² Mi amu utwe, balikani, Mulimu upakanga Linzwi la Hae ka lisupo ni liponiso, ili ku paka kuli Ku lukile, kona Linzwi leli bulezwi. Cwale muhupule, ona Liseli lene liinzi mwa Lilu lani, lene li file Sinulo. Ne nili....

Musizana wa ka yomunyinyani na ni bulelela, Sarah fa, kuli hane ba . . . Kuli sikolo kwani mwa Arizona ne ba talima mwa halimu kusina malu, mi habato bona ona Lilu la kunutu le mwa lilundu lani, ha li nanuha mwahali ni kukuta mwatasi, ni Mulilo wo mu fubelu unzo tuka ku Lona. Muluti ato lukulula litopa ni sikolo, mi a batisa kwande, mi ali, “Kana mukile mwa bona nto yecwalo haisali? Mutualime mo ku inezi kwani.”

Muhupule, lani kona Liseli le lifubelu leli swana le liinzi fa licwe. Konakuli ki Mulimu ya swana, Sinulo ye swana, ali, “Ba bulelele kuli baeze *cwana*.” Kona sene Ni mi bulelezi kakusasana kacenu, kacwalo ki Sani fale.

²³ Haiba ku ezahala cwalo mulikani yomunde, Muzwale Roy Roberson, wa teezeza kwa Tucson. Roy, wa hupula, ka zazi leliñwi, pono yo no boni ha no yemi fa lilundu? No tile ku na, mi Lilu lani ne liinzi fa halimu? Wa zamaya unzo shetumuka, wa ziba sa Na ku bulelezi; mi Ne ni ku bulelezi kwa ndu yani, zazi leliñwi? Kuli ki, Roy. Usike wa bilaela ni hanyinyani, mwana ka. Ku felile.

²⁴ Ha uzibi sani ze si talusa! Ki sishemo. Wa ku lata. Mi ni wena wa Mu lata, u Mu sebeleze ka buikokobezo ni ku Mu lapela mazazi a hao kaufela. Ube ya tabile, u zwelepili kupila ka mo uinezi. Haiba u tabile, zwelapili cwalo. Usike wa eza mafosisa hape, sina cwalo. Fela u zwelepili. Ki muhau wa Mulimu.

²⁵ Cwale Ni bata kulapela hape lu si ka kena kale mwa Linzwi. Ki babakai baba ka ni lapelela? Ni zamaya fela kuzwa mwa mukopano kukena mwa mukopano. Kikuli mu ka lapela?

Mwa ziba, Ni tabela ku mi opelela ka pina nyana, kaufela luna hamoho, lusika ya kale kwa Linzwi. Fela ka ku . . . ili kuli lukone kuziba Mulimu . . . Ka ku neela fela ko ku nyinyani. Kana mukile mwa utwa kapina nyana ka, *Wa Ku Tokomela?* “Mwahala lizazi ni maswabi, Wa ku tokomela.”

²⁶ Kalibe yomunyinyani akile ataha kwa piano. Ali, Ni bata ku itumela ku kalibe yomunyinyani yo, ni yena. Na mane ne ni sa zibi yo nali yena. Ki alimuñwi wa bana ba madikoni kwanu. Na kaniti . . . Ki musizana wa Muzwale Wheeler. Sa hulile cwale. Na li yo musisani nyana hana kile aina fa liñwele laka, ha ki kale hahulu, mi cwale seli kalibe luli. Kacwalo Ni itumela ku yena kuli u itusisize talenta ya hae mwa lipina, mi cwale uliza hamunati luli. Kana wa kona ku lufa mulizezo wa yona, kezeli? Kaufela luna hamoho cwale.

Wa ku tokomela,
Wa ku tokomela;
Mwa lizazi kamba muluti,
Wa ku tokomela.

Mwa lata cwalo? Halu iopeleñi hape, kaufela hamoho.

Wa ku tokomela,
 Wa ku tokomela;
 Mwa lizazi kamba muluti,
 Wa ku tokomela.

Muzwale Dauch, Wa ku tokomela, ni wena, muzwale. Kana ha u mu Mu lati? [Puteho ili, "Amen."—Mu.]

Halu inamiseñi litoho zaluna cwale.

²⁷ Mulimu Yomunde ya Sishemo, kakuba ni pampili nyana ye fa yena ni litaba ze nyinyani za kubulela kwa sicaba, ni kukuta hape ku swanisisa kwa kakusasana cwana, kakuli sani kona se batela sicaba ku to utwa. Na lapela, Mulimu, kuli U lumeleze batu kubona kuli Mulimu wa lata ni ku tokomela. Mi ne si na yana file Sani, Mulena, ne si pakilwe kuli ki Niti. Kacwalo Na lapela, Mulimu Yomunde, kuli lilato la Hao kamita li siyale mwahala sicaba. Busihu bo, fa kuba ni ku kauhana kasamulaho wa mukopano wo ni kuya kwa malapa a shutana, ki—ki mufuta wo lu hoha, mwa buino, bo butungile, Mulena. Ni lapela kuli U fuyole sicaba se.

²⁸ Cwale halunze lu atumela Linzwi, mwa tapelo, ni ku atumela Linzwi leli ñozwi, lu kupa kuli U nge Linzwi leli ñozwi le ni ku Li eza le li pila ku luna busihu bo. Mi ha lu ka siya muyaho wo busihu bwa kacenu ku kauhana kuya kwa malapa aluna a shutana, lu bulele sina bani bene bazwa kwa Emausi, bene ba zamaile ni Yena musihali kaufela kono niteñi ne ba si ka Mu ziba; kono ha Na be kenyize mwahali a muzuzu busihu bwani, ni minyako kaufela i kwalilwe, Aeza taba yeñwi yeswana fela sina ya Na ezize A sika takiswa kale. Ka sani, ba ziba kuli Na zuhile hape.

Eza sani hape busihu bo, Mulena. Lumeleza cwalo, minyako haisa kwalilwe, ni sikuwata nyana sa Hao si inzi mwahali mo, si libelezi. Mi, Ndate, ha lukaya kwa malapa aluna, lu ka bulela sina mo ne ba bulelezi, "Kana lipilu zaluna ne li sa tuki mwahala luna Ha na sweli kuambola ku luna mwa nzila!" Lu ipeya ili luna, ni lika kamukana, mwa mazoho a Hao, Mulena. Eza ku luna Mo bonela kuli ki swanelo. Ka Libizo la Jesu. Amen.

²⁹ Cwale halu keneñi fela mwa sebelezo cwale, kapili. Mu apule nina, haiba mukona, kwa Buka ya Maheberu, ni sinulo yeñwi fa Liñusa. Luka ambola ka mizuzu yelikani fela busihu bo, haiba Mulena alata. Mi cwale halunze lubala litimana za makalelo zetaalu za Maheberu 7:1 kuisa 3, mi cwale ni kubulela fateni. Mi ha lu zibi sa ka eza Mulena; ha lu zibi. Taba fela ye lueza ki ku lumela fela, kutona, kulapela. Ki niti njí? Ni ku lumela kuli "Uka eza lika kaufela ku beleka hamoho kwa bunde ku baba Mu lata," kakuli Na sepisize sani.

*Kakuli Melekisedeke yo, mulena wa Salema,
 muprisita wa Mulimu muambakani, yana katani*

Abrahama ha zwa kwa ku bulaya malena, mi amu fuyola;

Ki yena yo Abrahama nafile mubingu wa tutu kaufela; pili ha ku taluswa ki Mulena wa kuluka, mi kuzwa fo ki Mulena wa Salema, ili kuli, Mulena wa kozo;

Halu baleñi ku zwelapili nyana.

Kiya sina ndatahe, asina mahe, asina lusika, . . . hana makalelo a mazazi, nihaiba mafelelezo a bupilo; kono uezizwe sina Mwana Mulimu; ki muprisita wa kamita.

³⁰ Munahane ka Mutu yomutuna yo, ka butuna mwa lukela kubela Mutu yo! Mi cwale, puzo ki kuli, “Mutu yo ki mañi?” Baituti ba za bulapeli babile ni mihupulo ye shutana. Kono kuzwa kwa kukwaluha kwa Maswayo Asupa, Buka ya likunutu yene li kunutu ku luna . . . Kuya ka Sinulo 10:1 kuisa 7, likunutu kaufela ze ñozwi mwa Buka mo, zibile li patilwe mwahala lusika lwa ba ongaongi ba evangeli, li swanela ku tumuka kutiswa patala ka lingeloi la keleke ya lusika lwa mafelelezo. Ki babakai baba ziba kuli yeo ki niti? [Puteho ili, “Amen.”—Mu.] Yani ki niti, li lukela ku shokomoka. Likunutu kaufela za Buka ya likunutu li lukela ku patululwa ku mulumiwa wa Laodesia wa lusika lwa teni.

³¹ Ka kubona kuli kuna ni likañi hahulu ka Mutu yo ni tuto ye, Ni sepa kwa lukela kuli lu kene ku yona, kuli lufumane seo ali Sona yo. Cwale, kuna ni minahano ye miñata ka Yena.

Omuñwi wa minahano ubulela, kuli, “Ki litangu fela. Mane na si nihaiba mutu.”

Mi babañwi bali, cwana, “Neli buprisita. Bwani neli buprisita bwa Melekisedeke.” Yani kona ye bonahala kuba yona, kona baba ziba mbwesha kwatensi kufita neku leliñwi lani, kakuli ba bulela kuli neli buprisita.

Haku koni kuba cwalo, kakuli mwa timana ya bu 4 I bulela kuli Na li Mutu, wa “Muuna.” Kacwalo, fakuli abe Mutu, Ulukela kuba mwa butu, ali “Muuna.” Isiñi mulao; kono ki Mutu! Konakuli Na si fela mulao wa buprisita, kamba nihaiba kuli Abe litangu. Na li Mutu.

³² Mi Mutu ki wa Kuyakuile. Haiba mu lemuha, “Na sina ndate. Na sina mahe. Na sina nako Ya kile akala. Mi Na sina nako Ya kile afela.” Mi yo nali Yena kaufela usali ya pila ni busihu bwa kacenu, kakuli Bibele i bulezi mo, kuli, “Na sina nihaiba ndate, kamba mahe, makalelo a mazazi, kamba mafelelezo a bupilo.” Kacwalo I lukela kuba Mutu wa Kuyakuile. Ki niti yeo nji? [Puteho ili, “Amen.”—Mu.] Ki Mutu wa Kuyakuile! Konakuli ikona fela kuba Mutu alimuñwi, yani ki Mulimu, kakuli ki Yena fela Anosi wa Kuyakuile. Mulimu!

³³ Cwale, mwa Timotea Wapili 6:15 ni 16, haiba mubata ku i bala fa nako yeñwi, Ni bata kuli mu ibale.

Cwale, taba ye Ni lwanisa ki ye, cwana, Na li Mulimu, kakuli ki Yena fela Mutu anosi ya kona kuba ya sa shwi. Mi cwale, Mulimu ku i cinca Iliyena kuba Mutu; sani kona sa Nali sona, “Asina ndate, asina mahe, asina makalelo a bupilo, asina mafelelezo a mazazi.”

³⁴ Cwale lu fumana mwa Mañolo kuli batu babañata ba luta kuli, “likalulo zetalu za toho ya Bumulimu.” Konakuli, hamukoni kuba ni kalulo ya butu kusina mutu. Si lwala mutu kuli kube ni butu.

Mukutazi wa Baptist, lisunda nyana ze felile, a taha, mi kwa ndu yaka, a bulela ali, “Ni bata kuli ni ku akulule fa toho ya Bumulimu fokuñwi ha u kaba ni nako.” Na ni bizize, nitaluse.

³⁵ Se nili, “Ni na ni nako onafa, kakuli Ni bata ku zibisia hande, mi lu beye kwatuko lika kaufela, ka kueza sani.”

Ki ha taha, mi ali, “Muzwale Branham, uluta kuli kuna ni fela Mulimu alimuñwi.”

Se nili, “Eeni, sha.”

Yena ali, “Kihande,” mi ali, “Ni lumela kuli kuna ni Mulimu alimuñwi, kono Mulimu alimuñwi mwa Batu babalalu.”

Se nili, “Muñaka, kutela seo hape.”

Mi ali, “Mulimu alimuñwi, mwa Batu babalalu.”

³⁶ Se nili, “No ile kwa sikolo sifi?” Mwabona? Mi a ni bulelela kuli ki-ki kwa sikolo sa Bibebe. Se nili, “Ne ni lumezi sani. Haukonni kuba mutu kusina butu. Mi haiba una ni butu, konakuli una ni butu bo buswana ku wena. U kauhani, mutu alimuñwi cwalo.”

Mi yena ali, “Kihande, baituti ba za bulapeli ha bakoni ku tatulula zani.”

Se nili, “Ki ka sinulo.”

Mi yena ali, “Hanikoni ku amuhela sinulo.”

³⁷ Se nili, “Konakuli hakuna mukwa wa kuli Mulimu atahe ku wena, kakuli, ‘Li patilwe kwa meeto a baba butali ni ba bunangu, ni ku patululelwka kwa limbututu,’ ku patululwa, sinulo, ‘ku patululwka kwa limbututu ze swanelia ku li amuhela, ku ituta.’” Mi se Nili, “Haku konahali kuba mukwa wa Mulimu kufita ku wena; uikwalela ili wena ku Yena.”

Bibebe ki sinulo ya Mulimu. Keleke kaufela iyahilwe fa sinulo ya Mulimu. Hakuna nzila yeñwi ya kuziba Mulimu ka yona, konji fela ka sinulo. “Ku yo Mwana aka Mu patulula.” Sinulo; lika kaufela ki sinulo. Kacwalo, ku amuhe- . . . Ku sa amuhela sinulo, fo he u muituti wa za bulapeli ya batile fela, mi hakuna sepo ku wena.

³⁸ Cwale, cwale, lu fumana kuli Mutu yo “na sina ndatahe, na sina mahe, na sina makalelo a mazazi ni mafelelezo a bupilo.” Ne li Mulimu, *en morphé*.

Cwale, lifasi, linzwi leo lizwa, linzwi la Sigerike, litalusa, “cinceho,” ne li itusiswa. Ku i cinca Iliyena, *en morphé*, kuzwa ku Mutu yomuñwi kuba . . . Mutu yomuñwi; linzwi la Sigerike leo fani, *en morphé*, litalusa . . . Ne li zwile kwa ba bapali fa sibaka, kuli mutu ya swana yani ucinka sapalo sa hae, ku mu eza kuba mutu usili fela.

³⁹ Sina mwa—mwa sikolo, ha ki kale hahulu fa, Na sepa, Rebekah, a si ka feza kale sitopa, ne babile ni papali yeñwi ya Shakespeare. Mi mutangana yomuñwi na sweli ku cinca liapalo za hae hañata ñata, kakuli na bapalile liemba zepeli kamba zetaalu ze shutana; kono, neli mutu ya swana. Ha natile, nako yeñwi, na li sibulai; mi ato taha nako yetatama, neli mutu usili hape. Mi cwale linzwi la Sigerike lelili, *en morphé*, litalusa kuli na “cinca siyaba sa hae.”

⁴⁰ Mi sani kona sa na ezize Mulimu. Ki Mulimu ya swana ka nako kaufela. Mulimu mwa buino bwa kuba Ndate, yena—yena Moya, ona Siita sa Mulilo. Mulimu ya swana na eizizwe nama ni kupila mwahala luna, *en morphé*, na tisizwe kuli Akone ku boniwa. Mi cwale yena Mulimu ya swana yani ki yena Moya o Kenile. Ndate, Mwana, Moya . . . isiñi Balimu ba balaalu; liofisi zetalu, likezo zetalu za Mulimu alimumuñwi.

⁴¹ Bibele ibulezi kuli, “Kuna ni Mulimu alimumu,” isiñi ba balaalu. Kono kona mo ba palelezwi ku . . . Hamukoni ku toloka seo hande mi mufumane Balimu ba balaalu. Hamukoni ku lekissa seo ku Mujuda. Ni ka mi bulelela sani. Yena ya ziba hande, uziba kuli kuna ni fela Mulimu alimumu.

⁴² Mulemuhe, sina mubeti, wa pata, ni—ni lisila fahalimwa sona. Sani kona sa ezize Mulimu kwa lusika lo. Si patilwe. Ona lika ze kamukana li patilwe, mi li lukela ku patululwa mwa lusika ona loo. Cwale, Bibele ibulezi kuli li ka patululwa mwa linako za maungulo. Kuswana sina mubeti ya beya lika za—za musebezi wa hae li kwahezwi kufitela nako ya ka apula lisila fateni ku sona mi ki sani sa iponahaza.

Mi sani kona se ibile Bibele. Ibile musebezi wa Mulimu o apesizwe ku kwaheliwa. Mi I patilwe kuzwa kwa simuluho ya lifasi, mi Ki kunutu ya likalulo zesupa. Mi Mulimu na sepisize mwa lizazi le, kwa lusika lwa keleke ya Laodesia ye, kuli Uka apula lisila lani fateni mi lukone ku I bona. Ki taba cwani kwa kanya!

⁴³ Mulimu, *en morphé*, ya na ikapesize mwa Siita sa Mulilo. Mulimu, *en morphé*, ku Muuna ya bizwa Jesu. Mulimu, *en morphé*, mwa Keleke ya Hae. Mulimu fahalimwa luna, Mulimu ni luna, Mulimu ku luna; yena Mulimu yana shetumuka.

Kwa halimu Kwani, ya kenile, nekusina ya na Mu swala, Na ina fahalimwa lilundu; mi mane nihaiba folofolo ne ika ngunyuta lilundu, ne ina ni kushwa.

Mi cwale Mulimu ataha fafasi ku to cinca tende ya Hae, mi ataha fafasi ni ku to pila ni luna, ku toba alimuñwi wa luna. "Mi lwa Mu bona," Bibebe ubulezi cwalo. Timotea Wapili 3:16, "Ko kusina likaňi kunutu ya bumulimu ki yetuna; kakuli Mulimu na bonahalile mwa nama, ku swaliva ka mazoho." Mulimu na cile nama. Mulimu na nwile mezi. Mulimu a lobala. Mulimu a lila. Nali alimuñwi wa luna. Bunde, mo bu swaniselizwe bwa Bibebe!

Yani neli Mulimu fahalimwa luna; Mulimu ni luna; cwale ki Mulimu ku luna, yena Moya o Kenile. Ha ki Mutu wa bulaalu; ki Mutu ya swana!

⁴⁴ Mulimu natile fafasi mi a toba nama, mi a shwa lifu, ku Kreste; kuli A kenise Keleke, kuli akene ku yona, mwa kopano. Mulimu ulata kopano. Sani kona sa Na bupezi mutu ka nako ya pili, neli kubanga ni kopano; Mulimu upila anosi, ni Makerubimi.

⁴⁵ Mi amulemuhe cwale, Na bupile mutu, mi mutu awa. Kacwalo A taha fafasi ku to liulula mutu, kakuli Mulimu ulata ku lapelwa. Ona linzwi la kuli *mulimu* litalusa "sibupiwa se si si lapelwa."

Mi yo ya na tile mwahala luna, sina Siita sa Mulilo, sina sika se si cinca lipilu za luna, ki yena Mulimu ya swana yana bulezi kuli, "Ha ku be liseli," mi kwa ba liseli. Ki ya swana maabani, kacenu, ni kuyakuile.

⁴⁶ Cwale, kwa simuluhu Mulimu na pila anosi, ni milelo ya Hae, sina ha Ne ni ambola kakusasana kacenu. Yani ki minahano ya Hae. Nekusina sika, kwanda Mulimu anosi, kono Nana ni mihipulo.

Inge fela sikwala ha na kaina fafasi, mwa muhipulo wa hae, ni ku swanisa sa nahana kuli a—a yahe. Ku bupa, cwale, hakoni ku bupa. Ukona kunga sika se si bupilwe ni ku si eza mwa mufuta usili; kakuli Mulimu ki yena fela nzila anosi . . . kiyena fela Anosi ya kona ku bupa. Kono u nga sika mwa munahano wa hae sa ka eza, mi yani kona mihipulo ya hae, zani ki litakazo za hae. Cwale ki muhipulo, mi kipeto wa ubulela, mi iba linzwi fo cwale. Mi ona—ona linzwi ki . . .

⁴⁷ Muhupulo, ha u bulezwi, ki linzwi. Muhupulo o bulezwi kona linzwi, kono li lukela kuba muhipulo pili. Kacwalo, ki milelo ya Mulimu; uba muhipulo, mi uba linzwi.

⁴⁸ Mulemuhe. Bani baba nani, busihu bwa kacenu, Bupilo Bobusafeli, nebali ni Yena mi ku Yena, mwa munahano wa Hae, mane ku sikaba kale Lingeloi, naleli, Kerubimi, kamba sika sifi kaufela. Sani ki sa Kuyakuile. Mi haiba muna ni Bupilo Bobusafeli, mubile cwalo kamita. Ha ki kuba kwa mina mo, kono ki mufuta ni buino bwa Mulimu ya pahami . . .

⁴⁹ Mi haiba Ha palelwi sika kuli ha ki ya pahami, konakuli Ha ki Mulimu. Mulimu una ni kuba ya sa palelwi. Luna lwa palelwa

Iwa shwa; Yena ha palelwi. Mi Na li kai ni kai, ya ziba lito kamukana, mi ya mata kaufela. Haiba nji Ha yo cwalo, konakuli Hakoni kuba Mulimu. Wa ziba lika kaufela, libaka kaufela, bakeñisa kubateni kwa Hae mwa sibaka kaufela. Kuziba lika kamukana ku Mu eza kuba kai ni kai. Yena ki Sibupiwa; Ha swani sina moyo. Yena ki Sibupiwa; Upila mwa ndu. Kono ka kuba ya ziba linto kamukana, kuziba lika kaufela, ku Mu eza kuba kai ni kai, kakuli Wa ziba lika kaufela ze sweli ku ezahala.

Haku koni kuba tambani ye kona ku kobia meeto a yona kwanda kuli Wa i ziba. Mi Na i zibile ku sikaba kale lifasi, kuli ki linako ze kai haika kobia meeto a yona, ni buñata bwa lisuzo le i nani m wahala yona, ku sikaba kale lifasi. Sani ki kuba ya ipitezi. Luna halu koni ku li utwisisa mwa minahano ya luna, kono yani ki Mulimu. Mulimu, ya sa palelwi sika!

⁵⁰ Mi muhupule, mina, meeto amina, sibupeho sa mina, sene mu li sona kaufela, nemuli mwa minahano ya Hae kwa simuluh. Mi taba fela yeo muli yona ki ponahazo, linzwi. Kasamulaho Ha sa li nahaniile, A li bulela, mi ki mina ba cwale. Haiba ha ku cwalo, kambe ne mu siyo mwa munahano wa Hae, hakuna mukwa ni hanyinyani wa kuli mube kwani, kakuli Ki Yena ya fa Bupilo Bobusafeli.

⁵¹ Mwa hopula mo lu balezi Mañolo? “Ha ki ya lata, kamba ya mata, kono ki Mulimu!” Ni kuli mulelo wa Hae ukone kuyema uli wa niti, Na ketile, ku sikaba kale nako kaufela, kuli ki mañi. Mulimu u icemezi mwa kuketa kwa Hae. Kana mwa ziba cwalo? Mulimu u icemezi.

Ki mañi yana liteni kwa mulaho kwani ku Mu bulelala nzila yende ya ku bupa lifasi? Ki mañi yana ka nyamatala ku Mu bulelala kuli Na eza musebezi wa Hae ka mafosisa?

Mane nihaiba ona—nihaiba ona Linzwi luli, Kasibili, li icemezi luli. Nihaiba yona sinulo i icemezi. “U patulula ku yo A ka li patululela.” Yona sinulo luli, kasibili, i icemezi ku Mulimu. Cwalo kona batu mo ba nahaneli lika, ni kutula lika, ni ku nata fa lika, ba sa zibi se ba eza. Mulimu u ipitezi mwa misebezi ya Hae.

⁵² Cwale lu Mu fumana kwa simuluh, milelo ya Hae. Mi, cwale, ne mu li ni Yena kwani. Kwani kona ko ku bonahela Buka ya Bupilo.

Cwale, lu bala mwa Sinulo kauhanyo ya 13, timana ya 8, kuli, “Sibatana sene si tile mwa lifasi,” mwa mazazi a maungulo a, “si ka puma kaufela baba yahile mwa lifasi be mabizo a bona a si ka ñolwa mwa Buka ya Bupilo ya Ngunyana lifasi li si ka tomwa kale.”

⁵³ Munahane fateni! Fani Jesu asika pepwa kale, myaha ye likiti zene A si ka taha kale mwa lifasi, ni likiti zenwi za myaha mu si ka taha mwa lifasi; Jesu, mwa munahano wa Mulimu, na shwezi libi za lifasi, mi Buka ya Bupilo ne i lukisizwe, mi libizo la mina

ne li beilwe mwa Buka yani ya Bupilo mane mutomo wa lifasi u si ka ba teni kale. Yani ki Niti ya Bibebe. Mwabona, libizo la mina ne li lukisizwe ki Mulimu ni ku beiwa mwa Buka ya Bupilo ku si kaba kale mutomo wa lifasi.

⁵⁴ Ne muli teñi kwani mwa milelo ya Hae. Ha mu hupuli ni hanyinyani, batili, kakuli mu siemba fela sa Bupilo bwa Hae. Mu siemba sa Mulimu ha mu ba mwana mushimani kamba wa musizana wa Mulimu.

Sina fela ha muli siemba sa ndate wa lifasi! Yeo ki niti. Mu cwalo. Muuna u lwala lii le li pila, ona mali. Mi sani ha si ya mwa—mwa lii, konakuli mu ba siemba sa bo ndata mina; mi boma mina ki siemba sa bo ndata mina, hape; kacwalo mina kaufela mu siemba sa bo ndata mina.

Kanya! Sani si kasheza kopani fande, ni yona. Uh-huh. Kaniti ku cwalo! Mulimu, mwa lika kaufela, sibaka sinosi!

⁵⁵ Mulemuhe cwale milelo ya Hae. Konakuli mulelo wa hae pili, neli kuli, Mulimu; muhupulo, ona mulelo wani, kaufela yona ku Alimuñwi, kusina ku bonahala. Mi fani ha Na bonahalize, lwa bubeli, Na tiloba Linzwi. “Mi cwale Linzwi la ezwa nama ni kupila mwahala luna.”

⁵⁶ Muhalalehi Joani kauhanyo ya 1 ni timana ya 1, mulemuhe, se kikuli, “Kwa simuluhu.” Kono, ku sikaba kale, za Kuyakuile! Mulemuhe, “Kwa simuluhu ne kuna ni Linzwi.” Mi nako hane i kalile, neli Linzwi. Kono li si ka ba kale Linzwi, neli mulelo, muhupulo. Mi ne u bulezwi, “Kwa simuluhu ne kuna ni,” yona ponahazo, “ili Linzwi.”

Cwale se lu fita fo ku inzi Melekisedeke. Yani ki yena Mutu yo wa kunutu. “Kwa simuluhu ne kuna ni Linzwi, mi Linzwi ne lina ni Mulimu, mi Linzwi neli Mulimu.” “Mi cwale Linzwi la ezwa nama mi ato yaha ku luna.” Muswale seo cwale, mulemuhe.

⁵⁷ Sibupeho sa Hae—Hae sa pili neli Moya, Mulimu, ya ipitezi, ku lukile, yena wa Kuyakuile yomutuna. Sa bubeli, A kala ku ipupa Iliyena kutaha mwa nama, mwa *bungeloi*, u bizwa kuli “ki Linzwi; mubili.” Wo cwale kona muinelo wa Na li ku ona fani ha Na katani Abrahama, na bizwa Melekisedeke. Na li mwa sibupeho sa bungeloi. Cwale lu ka fita ku sani ni ku si nyakisisa mwa mizuzu ye likani, haiba Mulena alata. Na li yena Linzwi.

⁵⁸ Buino bwa bungeloi ki sika se mu sa koni ku bona. Sa kona kubateni fa cwale, kono hamukoni ku si bona.

Ku swana sina, kihande, inge mazimumwangala. Sani si mwa siyemo sesiñwi. Mazimumwangala; batu basweli ku zamaya zamaya ona mwa sibaka se onafa, ba opela; kuna ni mibala, hape. Kono liito linani maikuto feela a ketalizoho... Sibupeho sa mina si utwela fela kwa maikuto a ketalizoho, nitaluse. Mi muipeya ku seo meeto a filwe ku bona. Kono kuna

ni sibaka sesiñwi se si kona ku bonahala ka ku cinciwa, ka mazimumwangala.

⁵⁹ Cwale, mazimumwangala a i pangelangi maswaniso. Mazimumwangala ani a zamaisa fela mwa mukwa wa ona, mi kipeto siiponi sa mazimumwangala a li nopa. Kono siswaniso si teni fani, ka kukala. Mazimumwangala naliteni fa Adama hana liteni. Mazimumwangala naliteni fa Elia hana inzi fa Lilundu la Karmele. Mazimumwangala naliteni fa Jesu wa Nazareta hana zamaile fa likamba la Galilea. Kono musweli fela ku li lemuha. Ne ba sa koni ku li lumela kwa mulaho kwani. Ne mu ka lyangana kubulela sesiñwi se si cwalo. Kono cwale se ibile taba ya niti.

Mi kona mo kuinezi, Kreste yani uteni fa, ona Mangeloi a Mulimu ateni fa. Mi zazi leliñwi, mwa Mileniamu yetuna ye ka taha, likaba za niti luli kufita mazimumwangala kamba sika sifi kaufela, kakuli liteni fa.

⁶⁰ U i patulula Ili Yena mwa siyemo sesituna sa Za bulezi, sina Yena ha ikeza mwa bu *en morphé bwa* Hae ka kukena mwa batanga ba Hae ni kuipaka Iliyena.

⁶¹ Cwale, ki yo U inzi mwa mufuta wa Moya. Mi kipeto U taha mwa mufuta wa . . . wa *en morphé*. Cwale, Na bonahalile ku Abrahama, *en morphé*. Fani Abrahama hana zwa kwa ku bulaya malena, se kutaha Melekisedeke, ku to ambola ku Yena.

⁶² Zazi leliñwi mwa mutende wa ba Tucson, Ne ni sweli kubala kalulo ya kuli ne kuna ni—ni musali yana zamaisa mota mwa mukwakwa, Ni sepa mwendi neli ka limaili ze mashumi amane, mashumi aketalizoho ka hola, mi a hata muuna muhulu ya na apezi koti cwalo. Ahuwa ni ku yemisa mota ya hae. Ya mu yumbela mwa halimu. Ona mwahala lihalaupa! Mi aya inza mata ku yo mu bata, kono na si yo. Kacwalo ki sikamañi sa na ezize? Batu babañwi kwa mulaho wa hae ne ba boni seo ha si ezahala, neba boni muuna muhulu ha fufa mwa halimu, ni koti ya hae ha ifetauha. Mi ba matela kwa mulaho ku yo batisisa. Ba palelwa ku fumana muuna yani kai kamba kai. Ba biza mapokola. Mapokola ba taha ku to tatuba sibaka; ne ku sina mutu mwateni.

⁶³ Kihande, mañi ni mañi wa bona a paka kuli, “Mota ne izwezipili ku zamaya, ya nata mutu. A ya mwa halimu, mi mutu kaufela na iponezi.” Lipaki, mi zepeli kamba zetalu za limota za bona, ne ba boni ha li ezahala. Hane ba to lemuha, myaha ye ketalizoho kasamulaho, ba to fumana muuna muhulu ya apezi koti, yana hatilwe ni ku bulaiwa ona foo.

Ha mu zwa fa, ha mu si ka shwa. Mu lukela kukuta, ni ko mukaba baeza libi, ku to atulwa kuya ka likezo ze ez izwe mwa mibili. “Haiba tabernakele ye ya liluli i sinyeha, luna ni yeñwi ye libelezi.” *En morphé*, lani kona linzwi.

⁶⁴ Cwale, Mulimu, mwa siyemo se sa . . . Ki siyemo se sa pupo ya Hae, kasamulaho sa eزوا nama, Jesu. Kuzwa kwa sikamañi?

Kuzwa kwa makalelo a matuna, Moya, mi ataha ku to ba Linzwi, unzo taha ili Ona uñi. Linzwi ha li ikezi lona Liñi haisali, li bulezwi fela, *en morphe*, kasamulaho Uba nama, Jesu, butu, kuli atatube lifu la luna kaufela kakuba baeza libi.

⁶⁵ Fani Abrahama hana Mu katani, Na li Melekisedeke. U tatulula fa se ika eza milelo kaufela kwa mafelelezo, mwana kaufela wa Abrahama. Mwana kaufela wa Tumelo uka eza lika ze swana luli. Kono Ni bata ku tokomela mo lu swanezi ku tahela.

⁶⁶ Hape, lu Mu bona ha patululwa fa ku Ruti ni—ni Boazi, sina Muliululi wa mwa Lubasi, mwa Na lukela ku tahela mwa nama.

⁶⁷ Cwale lu bona mulelo, bana ba Moya wa Hae, ha ba si ka kena kale mwa mibili wa mufuta wa Linzwi. Kono, ki wa bungeloi; mibili wo u ipeile kwa Linzwi ni tibelelo, kwa tibelelo ye sepahala, ya ku cinciwa kwa mibili.

⁶⁸ Cwale, shutano yeli teni mwahala Yena ni mina, kakuba mwana. Mwabona, Na liteni, kwa simuluho, yena Linzwi, neli mibili wa bu *en morphe*. Natile ku to pila ku ona, ku Mutu yani yena Melekisedeke. Mi, kasamulaho, ha lu si ka utwa hape za Melekisedeke, kakuli Na tiloba Jesu Kreste. Melekisedeke neli Muprisita, kono Na tiloba Jesu Kreste. Cwale, ne mu fitelezi sani. Kakuli, mwa mufuta wani, Na zibile lika kaufela, mi ha mu si ka ziba kale zani mina.

Mutile sina Adama, sina na, ne mu zwile kwa mulelo kutaha ku to ba nama, ku to likiwa. Kono cwale bupilo bo ha bu se bufelile fa, “Haiba nji tabernakele ye ya liluli i snyeha, luna ni yeñwi ye libelela.” Kwani kona ko lu ya; lani kona Linzwi. Konakuli lwa kona kutilima kwa mulaho ni kubona se lu ezize. Cwale ha lu li utwisisi. Ha lu si ka ba kale Linzwi; lutile fela ku toba mutu wa nama, isiñi wa Linzwi.

⁶⁹ Kono, mi mutualime, luli sa utwahala hande, hamuna kuba Linzwi konji kuli nemuli muhupulo kwa simuluho. Sani si paka kulemuha kwapili kwa Mulimu. Mwabona? Hamukoni kuba Linzwi haiba ne mu si muhupulo. Ne mu lukela kuba mwa munahano, pili.

Kono, mwa bona, fa kuli tuyeme mwa muliko, ne mu fitelezi mibili wa bungeloi. Ne mutilefafasi fa mwa nama, ku to likiwa ka sibi. Mi cwale, haiba mu yema, “Kaufela bao Ndate a Ni file ba ka taha ku Na, mi Ni ka ba zusa ka lizazi la mafelelezo.” Mwabona, ne muna ni kuba sani pili.

⁷⁰ Mi cwale, mwa bona, Na tile ku shetumuka, ka mukoloko wo zibahala, kuzwa kwa muhupulo kutaha kwa . . . Ku sikaba kale mutomo wa lifasi, libizo la hae li beilwe mwa Buka ya Bupilo ya Ngunnyana. Mi, kuzwa fani, A to ba Linzwi, mibili wa bungeloi, ono kona ku bonahala, ni ku likela. Mi cwale A to ba nama ni kukuta hape, ku to zusa ona mibili o swana wani mwa buino bwa kanya.

Kono ne mu siile mibili wa bungeloi mi mwa toba mutu wa nama, ku to likiwa ki sibi. Mi cwale, "Haiba nji tabernakele ya liluli ye i sinyeha, luna ni yeñwi ye libelela." Haluna mibili yani pili.

⁷¹ Kono, mutualime! Fani mibili wo ha u amuhela Moya wa Mulimu, ona Bupilo bo bu sa shwi mwahala mina, u kenya mibili wo mwa ku ipeya ku utwa Mulimu. Haleluya! "Ya pepilwe ki Mulimu haezi sibi; hakoni kueza sibi." Maroma 8:1, "Ki fohe cwale hakusana katulo ku babali ku Kreste Jesu; baba sa zamayi ka nama, kono ka Moya." Ki fo he cwale. Mwabona, sani si beya mibili wa mina mwa ku ipeya kuutwa.

Ha mu lukeli ku bulela kuli, "Oh, kambe Ne ni ka tuhela kunwa! Kambe Ne ni ka . . ." Mukene fela ku Kreste, mi kipeto za fela kaufela zona, mwabona, mwabona, kakuli mibili wa mina u ipeya ku utwa Moya. Ha usali yo mwataswa ku utwela lika za lifasi; li shwile. Li shwile; libi za mina li pumbekilwe mwa kolobezo, mi se muli sibupiwa sesinca ku Kreste. Ni mibili wa mina, uipeya ku utwela kwa Moya, mulike kupila bupilo bwa mufuta o munde.

⁷² Inge mina basali baba ipapata kuli muna ni Moya o Kenile, kono muzwela kwande kwani ku yo apala tuputula ni zeñwi, mukona kueza cwani zeo? Kana Moya wa Mulimu ku mina ukona ku mi tuhela cwani kueza nto yeswana sina yani? Haku konahali fela kuba cwalo. Kaniti, haku konahali. Ha ki moyo o masila; Yena ki Moya o kenile.

⁷³ Mi cwale ha mu ipeya kutwela Moya wani, si beya sibupeho wa mina kaufela mwa Moya wani. Mi Moya wani ha ki sesiñwi mwa lifasi kono ki Peu ya Linzwi ye bonahalile, kamba yetisizwe kwa bupilo, haleluya, kutiswa kwa bupilo. Mi cwale Bibele hane ibulezi kuli, "Musike mwa eza sa *kuli*," mibili wani kapili ku Sona. Hakuna puzo.

Mi ki sikamañi seo? Ki ku sepahala kwa zuho. Mibili wo uka zuswa hape, kakuli u kalisizwe kale. Ne uli mwataswa sibi ka nako yeñwi, mwa masa ni kubola, kono cwale u amuhezi ku sepahala; u fetuhile kuba wa Lihalimu. Cwale, bwani kona buniti kuli mwa ya mwa Kuungelwa. Kona ku sepahala kwateni.

⁷⁴ Mutu ya kula inza lobezi, inza shwa, hakuna ze siyezi kwanda lifu; ki zona fela ze kona ku ezahala. Ni boni miluti ya batu, baba ciwa ki kansa ni butuku bwa maswafu; ni kubona batu bani, nako nyana kasamulaho wa fani, baiketile hande mi ba tiile. Haiba hakuna foliso ya Bumulimu, konakuli hakuna zuho, kakuli foliso ya Bumulimu kona ku sepahala kwa zuho. Amen!

⁷⁵ Mwa ziba seo masheleñi a sepahala ali sona, nji cwani? Ki pene ye lifiwa ka ku lumela mulatu. "Na holofalezi bumaswe bwa luna; ka muipa ya Hae lu folisizwe." Mulemuhe bunde bwa teni! Lwa Mu lata.

⁷⁶ Cwale, mubili wo u utwela Moya. Ha usika kena kale mwa mufuta wa Linzwi, kono lu sa li mwa sibupeho sa nama, kono u utwela Linzwi. Lifu mwa nama li ka lu isa kwani.

⁷⁷ Ki nto yeswana fela, munahane ka mbututu ye nyinyani. Mwakona kunga musali, hakuna taba kamba ki ya maswe cwani, haiba ki muima mi u libelela kuba me. Mutualime, mbututu yani ha si ka pepwa kale, Hanina taba kamba musali una ni pilu seta cwani, ukaba ni makeke hahulu. Kuna ni sesiñwi ka butu bwa hae...uka bonahala bumulimu, kubona me yomunyinyani ya libelela kuba mushemi wa musali, bukaufi ni mbututu. Kiñi hakuli cwalo? Mubili o munyinyani wani, cwale, ha u sika pila kale, mwabona, taba fela yateni ki nama ni mata. Se si sweli kutulaka sani, ki mata anza kashaka. Kono ha sa zwile mwa mba, Mulimu u bululela moyo wa bupilo ku yona, mi kipeto ya huwa. Mwabona, kuswana fela sina—sina kaniti inge mo ku bezi mubili wa nama wo bupiwa, kuna ni mubili wa moya o lukela ku i amuhela isa fita fela fa.

⁷⁸ Mi, mutu ha pepilwe sinca, kuzwa kwa Lihalimu, uba mbututu wa moya ku Kreste.

Mi, he, cwale sapalo se sa nama ha si tubuha, kuna ni mubili wa nama, wa bungeloi, mubili o so ka ezwa ka mazoho, kamba kupepwa ki musali, o lukena ku ona.

Cwale mubili wani wa kuta mi u yo nopa mubili wa kanya.

Ki kabakaleo Jesu ha naile kwa lihele ha Na shwile, mi a kutaza kwa miyo yeneli mwa tolongo; na kutezi hape mwa mubili wa bungeloi wani. Oh, haki kutabisa! Ku lumbwe Mulimu!

⁷⁹ Makorinte Babubeli 5:1, “Haiba nji mubili wo wa liluli, ona tabernakele ya liluli ye, luna ni omuñwi.” Mwabona, lu fitelezi kale wani, kutaha hande kuzwa ku Mulimu, mulelo; wa kuba nama, ku likiwa ki ku tatubiwa ka sibi, sina Adama mwa na ezelize. Kono cwale tatubo ya Linzwi la Hae ha i felile, konakuli lu ngiwa mwa mubili wo ili ono lu lukiselizwe ku sikaba kale mutomo wa lifasi. Ki Linzwi kwani lene lu tulile, kutaha fela cwalo,fafasi ku to tatubiwa ni ku likiwa. Kambe ne lutile ka nzila yani, neku si ke kwaba muliko; ne lu ka ziba lika kaufela. Kona libaka Jesu ha na ziba lika kaufela, kakuli Na li Linzwi A si ka ba kale nama. Mi se luba Linzwi.

⁸⁰ Fa lu bupilwe mwa sibupeho sa Linzwi, kuli lu ikabela kwa Linzwi, kufepa fa Linzwi, ka kuba baba lemuhilwe kale kuzwa kwa simuluho; mwa bona lumonyi lwa Bupilo lwani lone mu na ni ku mina kuzwa kwa simuluho, fani hane mu kalile musipili wa mina. Buñata bwa mina mwa kona kuhupula seo. Ne mu i kenyize mwa keleke *ye* ni ku i kenya mwa keleke *yani*, ne mu ka lika *se* ni *sani*; hakuna ze kulisa. Yani ki niti. Kono zazi leliñwi mwa to Li lemuha. Luli.

⁸¹ Busihu bobuñwi Ne ni sweli ku luta kokuñwi, Na sepa neli mwa California kamba Arizona, ka za . . . Na sepa Ni bulezi likande le lunyinyani leo kwanu, ka za mutu yana nani nasikuku mi abeya lii la mbande ku yona. Mi cwale mbande yani hane indondozi, ne li nyunywani yene bonahala ku sehisa hahulu yeo likuhu likile za bona fateni. Kono, ya zamaya kwa ni kwa. Ne ili—ne i bonahala bumaswe mwahala zona, kakuli ne ipalelwa ku utwisia nasikuku yani mwa na lilelanga ni ku fata fa libunda la musutelo ni kuca. Ne ipalelwa ku utwisia mulelo wani. Me wani ali, “Taha kwanu mu to ca, mulatiwa!” Kono, ne ili mbande; yona ne i sa ci cwalo. Ne li si lico za yona.

⁸² Kacwalo na swala limbimba ni zeñwi cwalo, mwa ziba, ni ku biza tuzwinyani twa likuhu. Mi ni zona likuhu ze nyinyani zani za latelela mwa mulaho, ku fata mwa mulaho, ni kuca. Kono mbande yenyinyani ne i palelwa kueza cwalo. Ne isa—ne isa talimi hande ku yona.

Konakuli zazi leliñwi maa yona ataha ku to i zuma.

⁸³ Mi ya utwa kuhu yani inze i lila. Ya lika ku fata ka bukwala, kono ne ipalelwa kueza cwalo. Ya lika kutaza lilata inge kuhu, kono ya palelwa kueza cwalo. Mwabona, ne ili mbande. Yona, ka kukala, ne ili mbande. Ne i ndondolezwi fela fa libubamelo la kuhu.

Zani li swana sina ma membala ba keleke. Mañi ni mañi . . . Cwalo kona mo kuinezi; mwendi iliñwi mwahala zeñwi, i lukile.

⁸⁴ Kono zazi leliñwi maa yona afufa fa halimu fani, mi a huwa. Ya li lemuha. Sani ne si utwahalile hande. Kiñi? Na li mbande, ka kukala.

Kona mo kuinezi ni Evangelii, kamba Linzwi, kamba Mata a Jesu Kreste. Mi mutu ha sa lelezwi pili kwa Bupilo Bobusafeli, uka utwa mulangu wa niti wani, muhuwo wa Mulimu, hakuna se si kona ku mu beya kwahule ni Ona.

Keleke ya kona kubulela kuli, “Mazazi a limakazo a felile,” kufata, kufata, kufata. “Yema fa mi uce se, mi uyeme fa ni kuca *sani*.”

⁸⁵ Lico za mwa masimu zani ha li lumelela ni yona, ni hanyinyani. U i congile! “Lika kaufela za konahala!” Ya nanuha kuzwafafasi.

Ki kabakaleo, hakuna ni butata mwahala Bakreste babañata kacenu, haba koni ku nanula mautu a bona kuzwafafasi.

Me wa kale naize, “Mwana ka, tula! Wena u mbande. Pahama kwanu ko Ni inzi.”

Ki hali, “Ima, Na lu kuba ni tule, mwa bupilo bwaka.”

⁸⁶ Maa yona ali, “Kihande, ha ku tule! Wena u mbande, ka kukala. Ha u kuhu wena.” Kacwalo atula hañwi mi ku

nata mafufa a hae; na si ka kondisa hande, kono a nanuha kuzwa fasasi.

Kona mo lu ezeza. Lu amuhela Mulimu ka tumelo, ka Linzwi leli ñozwi. Kuna ni sesiñwi mwahali mwani; ki bona Bupilo Bobusafeli bwani. Ne mu lelilwe ku bona.

⁸⁷ Bo kuku wa hae ba basali ni ba baana neli limbande. Na li mbande, kukuta kwa mulaho kafoo. Mbande ha ikopanangi ni lika zeñwi. Ha ki ya mazwake; batili. Yona ki mbande.

⁸⁸ Mi, kasamulaho wa ku lemuha Linzwi la Mulimu kuli neli Lico za Limbande, mi se musiya lika zeñwi. Fohe se mu bupilwe mwa siswaniso luli za Mulimu ya pila. Ne mu utwile kuzwa kwa mubili wa mina wa bungeloi. “Haiba nji mubili wa liluli wo u sinyeha, luna ni omuñwi o libelezi.”

Mu li, “Kana ki niti yeo, Muzwale Branham?”

Ku lukile, ha lu ngeni limbande nyana ni kutilima ku zona fa mizuzu nyana. Neku na ni libizo, muuna ya bizwa Mushe. Mañi ni mañi u ziba kuli mupolofita u bizwa mbande, mwa Bibele.

⁸⁹ Ne ku nani mupolofita ya bizwa Mushe. Mi zazi leliñwi Mulimu a mubiza, mi na si ka mutuhela kuya mwa sibaka, mi ki ha—ki ha shwela fa Licwe. Mangeloi a mu shimba ku yo mu pumbekwa.

Neku nani muuna yomuñwi, ki mbande, na sa swaneli nihaiba kushwa. Na ilo sila fela Jordani, mi Mulimu a luma koloi kwani; mi kubo ya nama ye ya wa, mi a nanuha ni ku swala mupuzo wa kamita.

Kasamulaho wa myaha ye mianda ye ketalizoho ka yemilalu, kasamulaho wa myaha ye mianda ye ketalizoho ka yemilalu, fa Lilundu la Kubenya, fani kwa yema baana bababeli bani. Mubili wa Mushe no so bolile mianda anda ya lilimo, kono fa na inzi mwa buino bwani kufitela mane ni yena Pitrosi, Jakobo, ni Joani a mu lemuha. Amen! “Haiba nji tabernakele ya liluli ye i sinyeha,” haiba nji u mulelo wa Mulimu o bonahalezi fa lifasi fa, “muna ni mubili o libelezi ha mu siya lifasi le.” Nebali fani, inze ba yemi fa Lilundu la Kubenya, mwa mubili wa bungeloi. Kakuli, neli bapolofita be Linzwi ne litile ku bona.

⁹⁰ Hape ha lu lemuheni mupolofita yomuñwi, nako yeñwi, wa libizo la Samuele. Na li muuna yomutuna. Na lutile Isilaele; na ba bulelezi kuli basike kuba ni mulena. Mi ali, “Kana Ni kile na bulela sika ku mina ka Libizo la Mulena kwanda se si ezahalile?”

Mi bali, “Batili. Lika kaufela zo kile wa bulela ka Libizo la Mulena li bile li ezahalanga.”

Na li mupolofita, mi a shwa.

⁹¹ Mwendi kasamulaho wa lilimo zetaalu kamba zene, mulena a kena mwa butata; kwani neli kwa mulaho fani Mali a Jesu Kreste a si ka suluha kale. Na li mwa paradaisi. Mi mulauli wa musali

wa kwa Endore a kupa kuli ku tahe yomuñwi, mi ato ombaomba Saule. Mi cwale mulauli ha mubona inza yemi, abulela ali, “Ni bona mulimu ya nanuha kuzwa mwa mubu.”

⁹² Mi kasamulaho muuna ha sa shwile, ku pumbekwa, ni kubola mwa libita, na yemi fani mwa liñope, ali ku apala liapalo za mupolofita; mi na sa li mupolofita, amen, kakuli na bulezi kuli, “Kiñi ha mu ni zusize mwa pumulo yaka, kakuli so bile sila ku Mulimu?” Mu mutualime ha ka polofita. “Kamuso busihu, ka nako ye, ukaba ni na.” Na sa li mupolofita, nihaike nge na sa zwile mwa mubili wa hae.

Mwabona, na tile fa mi aba siemba sa Linzwi lani, mi a kenya sinca bupilo mwa mubili wo no lukiselizwe yena kuzwa kwa mutomo wa lifasi. Na keni mwa mubili wa bungeloi, onoli Linzwi. Mwa utwa nji? Kwani kona ko kuya balumeli kaufela ha lu zwa fa.

⁹³ Mi, mwa mufuta wani, lisila konakuli li apuzwi. Mwa bona, mina mu Linzwi, hape, ha mukena mwahali mwani. Sina mbututu yomunyinyani; sina ha Ni bulezi nako nyana ye fitile . . .

⁹⁴ Cwale mulemuhe. Ku lumbwe Mulimu kwa ku kwaluha kwa Maswayo a, kona tapelo ya ka, kuziba lika ze!

⁹⁵ Cwale sinulo ya niti ya Melekisedeke i taha ka ku bonahala hande. Sikamañi? Na li Mulimu, ili Linzwi, fani A si kaba kale nama; Mulimu, Linzwi. Kakuli, Na nana ni kuba cwalo; hakuna usili ya na kaba ya sa shwi sina Yena. Mwabona, Ni na ni ndate ni me; ni mina muna ni, hape. Jesu nana ni ndatahe ni mahe. “Kono Muuna yo na sina ndatahe, kamba na sina mahe.” Jesu nana ni nako fa Na kalile; Muuna yo na si yo cwalo. Jesu nafile bupilo bwa Hae; Muuna yo na sike kueza sani, kakuli Nali yena Bupilo. Mi ki yena Muuna ya swana mi anosi ka nako kaufela. Ni sepa kuli Mulimu wa mi patululela zona. Yena Mutu ya swana mi anosi, ka nako kaufela.

⁹⁶ Mulemuhe lilumbatina la Hae, “Mulena wa kuluka.” Cwale, Maheberu 7:2, “Mulena wa kuluka, ni Mulena wa kozo.” Ki yena malena bababeli. Cwale mulemuhe, Maheberu 7:2, “Mulena wa kuluka, hape ki Mulena wa kozo.” Ki malena bababeli fani. Cwale kakuli Utile mwa nama ni ku amuhela mubili wa Hae, mwa Sinulo 21:16, U bizwa kuli, “Mulena wa malena.” Ki yena zetalu cwalo, hamoho. Mwabona, Mulena Mulimu, Mulena wa Bungeloi, Mulena Jesu. “Ki yena Mulena wa malena.”

Kaufela li kopani, kuswana fela sina moyo, mubili, ni moyo, kaufela litaha ku to bupa nto iliñwi.

⁹⁷ Hape, Ki yena Ndate, ya nali wa pili; Ndate; ni Moya o Kenile, ona Moya.

“Mulena wa kuluka,” mulelo wa Moya; bungeloi, “Mulena wa—wa kozo,” bungeloi; mi ni nama Na li “Mulena wa malena,” Mutu ya swana.

⁹⁸ Fani mubili wa bungeloi, wa Mushe ha no Mu boni, Exoda 33:2, Nali wa bungeloi. Mushe na bata kubona Mulimu. Na utwanga linzwi la Hae, ku Mu utwa inza bulela ku yena, ku Mu bona mwa sicacani kwani, sina Siita sesituna sa Mulilo. Mi ki hali, “Ki Wena mañi? Ni bata kuziba Yo uli Yena.” Mushe abulela. “Ni ka beya . . .” “Kambe U ka ni lumeleza kuli ni Ku bone, Ni tabela ku bona pata ya Hao.”

⁹⁹ Ki hali, “Hakuna mutu ya kona kubona pata ya Ka.” Mi ali, “Ni ka beya lizoho la Ka fa meeto a hao, mi Ni ka fita. Mi uka bona mukokoto wa Ka, kono isiñi pata ya Ka.” Mwabona? Mi ha Na ezize cwalo, neli mukokoto wa Muuna; neli wa bungeloi. Mi cwale Linzwi lene litile ku Mushe, “NITENI,” lani neli lona Linzwi. Linzwi la taha ku Mushe mwa mufuta wa Siita sa Mulilo mwa sicacani se si tuka mulilo, yena “NITENI.”

¹⁰⁰ Sina Linzwi lelizwa kwa lituto za bulapeli . . . kuzwa ku za bungeloi, nitaluse. Muni swalele. Na tile ku Abrahama sina Muuna, mwatasa kota ya oke. Cwale mutualime ku sani. Nekutile Muuna ku Abrahama, babalalu cwalo, mi baina fafasi mwatasa kota ya oke, babalalu cwalo. Mi mulemuhe, Ha sa felize kuambola ku Abrahama . . .

¹⁰¹ Kiñi sa Na tezi? Abrahama, kakuba yena yana nani sepiso ni liñusa la mwana ya na taha, mi hape nali mupolofita wa Linzwi la Mulimu yana sepa Linzwi la Mulimu, kubiza lika kaufela ka kushutana inge kuli ha li cwalo. Mwabona Linzwi mo li petahalezi? Linzwi nelitile ku mupolofita. Mwabona, nekuna ni Mulimu mwa bungeloi. Mi Bibele ibulezi kuli, “Linzwi litahanga ku mupolofita.” Mi fa nekuna ni—ni Linzwi mwa bungeloi.

Cwale muli, “Kana neli Mulimu yani?”

¹⁰² Abrahama naize neli yena. Na bulezi libizo la Hae, nali, na Mu bizize kuli Elohim. Cwale mwa Genese 1, mu fumana kuli, “Kwa simuluho *Elohim* na bupile lihalimu ni lifasi.” Mwa Genese 18, lu fumana kuli—kuli Abrahama na bizize Mutu yo . . . yana inzi fani ni ku ambola ku yena, mi na mu bulelezi likunutu za pilu ya hae, ku mu bulelela seo Sarah na nahana kwa mulaho wa Hae. Abrahama ali, “Ki Elohim.” Na li mwa mufuta wa bungeloi. Mwa utwa nji? Mulemuhe kasamulaho . . .

¹⁰³ Cwale lu fumana kuli Nali mwa buino bwa bungeloi nako yani. Na Mu bizize kuli, “Mulena Mulimu, Elohim.” Cwale, mwa Genese 18, lu fumana kuli yeo ki niti.

¹⁰⁴ Cwale mulemuhe Abrahama. Nebali babalalu cwalo hamoho, kono Abrahama hana katani babalalu, abulela kuli, “Mulena ka.”

Kono cwale Lota, kwani kwa Sodoma; bababeli ba kubona neba ile kwani, mi Lota abona bababeli cwalo banze ba taha, mi ali, "Malena ka." Mwabona, butata neli bufi? Nako sa pili, Lota ne si mupolofita, yani ki niti, kamba nihaiba kuba mulumiwa wa hola ya hae, kacwalo na sina nihaiba sinulo ka Yena. Yeo ki niti luli. Lota na ba bizize kuli "malena." Mwa buñata bwa bona, niteni na bulezi kuli, "malena."

Kono hakuna taba kamba Abrahama na boni babakai, Ne ili fela Mulena alimuñwi. Yani ki Mulimu. Yo neli yena Melekisedeke.

¹⁰⁵ Mulemuhe, kasamulaho ndwa imano fela, Melekisedeke alukiseza mwana Hae mulalelo yana tuzi; munahane ka seo, siemba sa Hae kasibili! Cwale lu bata ku bona fa. Mwa mufuta fa ki, ku bonahala, mulalelo. Kasamulaho wa ndwa, Na file ku za Hae, kakuli mulalelo ki siemba sa Kreste. Mi kasamulaho wa ndwa ha se i felile, kasamulaho mu feza ku natiwa, kona mu kona kuca za Kreste, mu ba siemba sa Sibupeho se. Mwa utwa nji?

¹⁰⁶ Jakobo na lwanile busihu kaufela, mi na sa lati ku Mu tuhela konji Ha na mu fuyozi. Yani ki niti. Ku lwanela Bupilo! Mi kasamulaho ndwa i fela, kipeto Mulimu umifa za Hae kasibili. Wani kona mulalelo wa Hae wa niti. Sinkwa se si likani ni liñende li U yemela fela. Ha mu lukeli ku ca kwanda kuli mu lwanile ni kuba siemba sa Mulimu.

¹⁰⁷ Muhupule, ka nako ye, mulalelo ne u si ka zibahazwa kale, konji ka nako ya ku sutelela kwa lifu la Jesu Kreste, mianda ni mianda ni mianda ya lilimo kasamulaho.

¹⁰⁸ Kono Melekisedeke, kasamulaho mwana Hae Abrahama kuwina tulo, Melekisedeke a mu katana ni ku mufa veine ni sinkwa; ku bonisa kuli kasamulaho ndwa ya lifasi ye i fela, lu ka Mu katanyeza mwa lihalimu ni kuca mulalelo hape. Ikaba Mulalelo wa Linyalo. "Ha ni sana kunwa hape kwa veine ni kamuta, kamba kuca muselo, konji ha Ni ka i ca ni ku i nwa ni mina, sinca, Ili mwa Mubuso wa Ndate." Ki niti yeo nji?

¹⁰⁹ Mulemuhe hape, Melekisedeke na ilo katanyeza Abrahama a si ka kuta kale kwa hae. Ki mufuta kwa bunde cwani o lu nani fa! Melekisedeke u katanyeza Abrahama asika kuta kale kwa hae, kasamulaho wa ndwa.

Luka katanyeza Jesu mwa mbyumbyulu, lusika fita kale kwa Hae. Yani ki niti. Matesalonika Babubeli ya lu bulelela cwalo, kuli, "lu ka Mu katanyeza mwa mbyumbyulu." Ki mufuta womunde wa Rebekah hana katanyelize Isaka, mwa simu, mwa manzibwana a lizazi. "Lu ka Mu katanyeza mwa mbyumbyulu." Matesalonika Babubeli ya lu bulelela cwalo. "Kakuli luna baba pila mi lu siyala haluna ku tibela kamba ku paleliswa bani baba lobez; kakuli tolombita ya Mulimu ika lila; baba shwezi ku Kreste ki ha ba ka zuha pili; luna baba pila mi lu siyezi

lu ka ngelwa hamoho ni bona, ku yo katanyeza Mulena mwa mbyumbyulu." Kupetahala, ona mifuta ye kamukana.

¹¹⁰ Kabakaleo, za bungeloi, haiba mu shwile ni ku kena mwa mubili wa bungeloi wani, (ki sikamañi se si ezahala?) mubili wa bungeloi utaha mwa lifasi kutonga mubili wo liuluzwi. Mi haiba muteni mo mwa mbyumbyulu, mukanga mubili ku katanyeza wani wa bungeloi, ki fo he cwale, "ni kuungelwa, ni ku katanyeza Mulena mwa mbyumbyulu."

¹¹¹ Ki mañi Melekisedeke yo kwanda kuba Mulimu!

¹¹² Cwale fa lu bona patalaza kunutu ya musipili wa bupilo bwa luna ye kwanile, ni lifu, ni ko lu ya kasamulaho wa kushwa. Hape, ku lemuhiwa kwa makalelo kwa iponahaza hande fa. Cwale muiteeleze hanze lu luta taba ye, ka tokomelo.

¹¹³ Likalulo za—za mulelo wa Kuyakuile wa Na nani mwa kunutu ya Hae u patuluzwi cwale. Mulemuhe, ku sa na ni likalulo zetalu kwa kupetahala. Kuswana fela sina Ha liulula lifasi; ka mukwa o swana U liulula Keleke ya Hae. U liulula sicaba mwa likalulo zetalu. Cwale mutualime. Sa pili ki ku beiwa baba lukile, sina Luther hana kutilize; sa bubeli, ku keniswa, sina Wesley hana kutilize; sa bulaalu, kolobezo ya Moya o Kenile. Yani ki niti. Kona kutaha Kuungelwa!

¹¹⁴ Cwale, lifasi, Na liuluzi cwani lifasi? Sa pili, sa Na ezize, hane li ezize sibi, Na li tapisize mwa kolobezo ya mezi. Yani ki niti. Mi A lotiseza Mali a Hae ku lona, kuzwa kwa sifapahano, ni ku li kenisa ku libiza kuli ki la Hae Tota. Mi ki sikamañi Sa eza? Sina Ha na pazuzi lifasi kaufela kuzwa ku mina, ni ku bupa sinca taba kaufela ka kolobezo ye sabisa ya Moya o Kenile, Uka bupa sinca cwalo ni lona lifasi. Mi li ka cisiwa ka Mulilo, ni ku kenisa kwa kokwani kaufela, ka buñata bwa limaili mwa halimu, lika kaufela li ka keniswa mwateni. Mi cwale kuna ni Lihalimu Lelinca ni Lifasi Lelinca, kuswana fela sina ha mu li sibupiwa se sinca ku Kreste Jesu haiba Moya o Kenile u mi swala. Mwabona, ki fo he cwale, taba kaufela inamile hande mo ikona kubela. Liki kaufela li mwa bulaalu.

¹¹⁵ Kupepwa kwa nama kuinzi mwa likalulo zetaalu. Ki nto mañi ya pili ye ezahalanga ku musali fa kupepa mbututu? Ki sikamañi se si zwanga pili? Mezi. Ki sikamañi se si zwanga lwa bubeli? Mali. Ki sikamañi se si tatama? Bupilo. Mezi, mali, moyo.

Ki sikamañi se si ezahalanga kwa simela? Sabola. Sapili ki sikamañi? Lutaka. Se si tatama bo? Sibunga. Se si tatama bo? Sikapi. Mi kona kuzwa bubeke mwateni. Ki likalulo fela zetalu ku yona, kufita i fita kwa bubeke. Yani ki niti.

¹¹⁶ Mulimu wa paka cwalo. Sani sibile niti kamita. Mulimu u si paka kuba sa niti. Ku bonisa patalaza, baba lemuhilwe pili ki bona baba lukiselizwe piliso. Kikuli mu utwile nji? Mutuhele ni bulele sani hape. Baba lemuhilwe pili ki bona baba lukiselizwe piliso. Batu bakona kueza inge, ku nahana kuli ba cwalo, kono

piliso ya niti ki bani baba lemuhilwe pili. Kakuli, lona linzwi la *kuliulula* litalusa “ku kutisa.” Ki niti yeo? *Kuliulula* ki nto yeñwi... *Kuliulula* sika, ki, “ku si tisa mwa sibaka sa sona sa makalelo.” Haleluya! Konakuli ki baba lemuhilwe fela pili kona baba kona ku kutiswa, kakuli babañwi ne ba si ka zwa Kwani. Mwabona, “ku kutisa!”

¹¹⁷ Kuba ba Kuyakuile ni Yena, kwa simuluho... Ona Bupilo Bobusafeli bo ne mu nani, milelo ya Hae ya sene muli sona, fela, Na bata mina kuli mu... Na bata na kuli ni yeme fa katala, ni kutaze. Na bata kuli mina muine mwa sipula busihu bo. Konakuli lu sebeleza mulelo wa Hae wa Kuyakuile. Mi ni yena ya zwile kwa hae, utile fela mwa lifasi ku to beleka mulelo wa Hae. Ki niti yeo nji? Ku lukile. Mi, haku felile zeo, li tiswa mwa siyemo sa kufiwa kanya; i hulile mi ya kutiswa hape.

¹¹⁸ Ki kabakaleo Paulusi na bulezzi kuli, fani hane ba yaha limota kuli ba mu pume toho; ki hali, “O lifu, buka i buhazo bwa hao? O libita, i kai tulo ya hao? Kono tumbo ibe ku Mulimu Yena ya lufa tulo!” Mi ali, “Lifu, ni bulelele fo kona ku ni sabiseza! Libita, ni bulelele mo ka ni kwaciseza! Kakuli, Ni muluwi wa Bupilo Bobusafeli.” Amen! Na li lemuhile. Lifu, lihele, libita, hakuna sene si kona ku mu swala. Mi hakuna se si kona ku lu holofaza, luna ni Bupilo Bobusafeli! Na lemuhile kuli una ni Bupilo Bobusafeli.

¹¹⁹ Kuswana fela sina maloteli a puka. Haiba Ni utwisisa, ki... Hani zibi hahulu ka lituto za muinelo wa lika ka sayansi. Kono, i lukela kuba kuli ki—ki ku kanga kwa mukamo mwa halimu. Mi cwale busihu ha ku bata ni ku unsufala, ya wa kwa halimu ni ku suluhelafafasi. I wile kuzwa kokuñwi. Kono kakusasana leli tatama lizazi li si ka pazula kale, i inzi fani, mwana yomunyinyani, uka njanja silami. Kono mutuhele fela lizazi kuli li pahame nyana, mu litalime ha li ya li benya. Wa tabelia. Kiñi? Lizazi li ka ibiza ku kutela ko i zwile.

Mi yani kona nzila yeswana ni Mukreste. Haleluya! Lu ziba kuli ha lu zamaya kukena mwa Kubateni kwa Mulimu, sesiñwi ku luna si lu bulelela kuli lu zwa kokuñwi, mi lu ka kutela hape ka Mata ani asweli ku lu hoha.

¹²⁰ Maloteli a puka yenyinyani ani, ya benya ni ku monyeha ni ku huwa, kakuli i ziba kuli izwa kwa halimu kwani, mi lizazi lani li ka i hohela mwa halimu hae.

Mi mutu ya li mulelo wa Mulimu, ya pepilwe ki Mulimu, wa ziba, haleluya, ha taha mwa kutwano ni Mwana Mulimu, uka bizezwa mwa halimu kuzwa fa ka zazi leliñwi. “Kakuli ha Ni ka nanulwa kuzwa mwa lifasi, Ni ka hohela batu kaufela ku Na.” Amen!

¹²¹ Cwale amulemuhe, cwale, lu bona Melekisedeke ni libaka leo Maria na si me wa Hae. Kona ha Na mu bizanga kuli “musali,” isiñi kuli *ima*. “Na si na ndate,” kakuli Yena nali yena Ndate,

Ndate wa kamita, zetaalu ku Alimuñwi. “Na si na mahe,” kaniti kutokwa. Na si na ndate, kakuli Na li yena Ndate. Sina muloki ha na bulezi nako yeñwi, ku bulela litaba zetuna za tumbo ka Jesu, mi ali:

KI NA yana bulezi ni Mushe mwa sicacani se
si tuka mulilo,
KI NA Mulimu wa Abrahama, Naleli ye Benya
ya Kakusasana.
KI NA Alfa, Omega, wa makalelo kuzwa kwa
mafelelezo.
KI NA pupo kamukana, mi Jesu kona Libizo.
(Ki niti yeo.)
Oh, mina muli ki Na mañi, mi hape bali Ni zwa
kai,
Kana mwa Mu ziba Ndate, kamba kikuli
mwakona ku bulela Libizo la Hae?
(Haleluya!)

¹²² Lani kona Libizo la Ndate! Eehe, “Na Ni tile ka Libizo la Ndate, mi ha mu Ni amuheli.” Mwabona? Luli, Ki ya swana maabani, kacenu, ni kuyakuile.

¹²³ Mi Melekisedeke yo aba nama. Na i patuluzi Iliyena kuba Mwana mutu ha Na tile, sina Mupolofita. Na tile ka mabizo amalalu a Mwana; ali Mwana mutu, Mwana Mulimu, ni Mwana Davida.

¹²⁴ Fani ha Na li fa lifasi fa, Ne li Mutu, ku taleleza Mañolo. Mushe ali, “Mulena Mulimu wa mina u ka zusa Mupolofita ya swana ni na.” Kacwalo Na nani kutaha sina Mupolofita. Na si kali, ku bulela kuli, “Ki na Mwana Mulimu.” Mi ali, “Ki na Mwana mutu. Kana mwa lumela ku Mwana mutu?” Kakuli, sani kona sa Na pakile ka sona, kakuli sani kona sa Na li sona.

Cwale U tile mwa Libizo la mwana yomuñwi, Mwana Mulimu; ya sa bonwi, Moya.

Mi cwale Ha ka taha hape, Ki yena Mwana Davida, kuina fa lubona lwa Hae.

¹²⁵ Cwale fani ha Na liteni fa mi nali mwa nama, Na bizwa, “Mwana mutu.” Cwale, Na itibahalize cwani Iliyena kwa lifasi ka kuba Mwana mutu, ili Mupolofita?

¹²⁶ Zazi leliñwi Ne ni kandeka likande la Pitrosi ni Andreasi, munyana hae. Nebali bayambi, mi ndata bona Jonasi neli mulumeli wa kale. Zazi leliñwi ba bulela kuli ne ba inzi mwa matuko a mukolo. Ki hali, “Bana, wa ziba mo lu lapelelanga ha lu tokwa litapi.” Nebali bayambi ba licaziba. Mi ali, “Lu sepile Mulimu, Jehova, kwa kuipilisa kwa luna. Mi se Ni ya ni supala cwale; Hanisa kona kuina ni mina bashimani fa nako yetelele. Mi kamita Ni bile, sina balumeli ba niti kaufela, ni libelezi nako yani Mesia ha ka taha. Lu bile ni mifuta kaufela ya mahata, kono kutaha Yomuñwi wa niti, zazi leliñwi.” Mi ki hali, “Mesia yo ha

ka taha, Hani lati kuli mina bashimani mu pumiwe. Mesia yo ha na kuba fela muituti wa za tumelo. Ukaba Mupolofita, wa mupolofita wa luna Mushe, ki yena ye lu latelela, a bulela.”

Cwale, Mujuda kaufela uka lumela mupolofita wa hae. U lutilwe ku ziba zeo. Kono haiba mupolofita ubulela sika se si cwalo, konakuli yeo ki niti. Kono Mulimu naize, “Haiba kuna ni alimuñwi mwahala mina, wa moyo, kamba mupolofita, Na nili Mulena ni ka itibahaza Ilina ku yena. Mi sa bulela ha si to ezahala, konakuli yoo mu mu utwe mi mu mu sabe; kono haiba ha si ezahali, fohe mu si ke mwa mu saba ni hanyinyani.” Mwabona? Kacwalo bwani neli—neli bupaki bwa mupolofita.

¹²⁷ “Kacwalo Mushe neli mupolofita ya pakilwe, mi ali, ‘Mulena Mulimu wa mina uka zusa, mwahala mina, ya zwa mwahala bana ba henu, Mupolofita ya swana ni na. Mi kaufela ya sike ku mu utwa uka bulaiwa kuzwa mwahala sicaba.’” Ki ali, “Cwale, bana, muhupule, seo, sina Maheberu, lu lumela mwa bapolofita baba pakilwe ki Mulimu.”

Cwale muteeleze hande. Musike mwa mbwinja zeo. Mi ali, “Mi Mesia ha ka taha, mu ka Mu ziba, kakuli U kaba Mupolofita-Mesia. Cwale, ne ba bulezi kuli neli myaha ye mianda yemine. Ha lu si ka ba ni mupolofita kuzwa ku Malaki, kono ukaba cwalo!”

¹²⁸ Zazi leliñwi, kasamulaho wa lifu la hae, lilimo nyana, mwana hae wa mushimani Andreasi na sweli ku zamaya fa likamba la nuka. Mi autwa muuna wa mushitu wa mwa lihalupa, kuli, “Mesia yani uyemi mwahala mina cwale!” Ona mbande yetuna yene utezwi mwa lihalupa ni ku fufela kwani, ali, “Mesia u mwahala mina ona cwale fa. Ha lu si ka Mu ziba kale, kono U yemi mwahala mina. Ni ka Mu ziba, kakuli Ni ka bona sisupo se si zwa kwa Lihalimu.”

Zazi leliñwi abulela ali, “Fani, amubone, ki Ngunyana ya Mulimu ye takula sibi sa lifasi!”

Mi ki yani aya . . . aikela muuna yo, ku yo bata muhulwana hae wa muzwale. Mi ali, “Simoni, Ni bata kuli utahe kwanu; lu mu fumani Mesia.”

“Oh, zwelapili, Andreasi! U ziba zende kufita zeo!”

“Oh, Na ziba. Kono, kikuli, Muuna yo yena u ipitezi.”

“U inzi kai? Kana U zwelela kai?”

“Jesu wa Nazareta.”

“Ona muleneñi o munyinyani wani, o maswe? Kiñi, Na sa swaneli kuzwa kwa sibaka se si maswe, sa masila cwalo sani.”

“Wena taha fela u to bona.”

¹²⁹ Mafelelezo a mu susueza ku taha kwani zazi leliñwi. Konakuli ha na tile fa pila Mesia yo, Jesu na yemi fani, inza bulela kwa sicaba. Ha na ilo yema fapila Hae, A bulela kuli, “Libizo la hao ki wena Simoni, mi u mwana Jonasi.” Sani kona

sene si ezize lika. Na bile ni linotolo za Mubuso. Kiñi? Na ziba kuli Muuna yani na sa mu zibi. Mi cwale Na mu zibile cwani, ni ndate yani wa bumulimu yana mu lutile mwa ku lumelela Mesia?

¹³⁰ Neku na ni muuna yana yemi fani, wa libizo la Filipi. Oh, na tabezi hahulu! Na zibile muuna yomuñwi, yana balanga Bibebe ni yena. Mi aikela cwalo, kwa buse bwa lilundu, mi a yo mu fumana kwande kwani mwa simu ya likota za olive. Na kubamafafasi, inza lapela. Neba bile ni lituto zeñata za Bibebe hamoho, kacwalo azwela kwani. Mi abulela kuli, ha sa felize kulapela, abulela kuli, “Taha, utobona Yo lu fumani; Jesu wa Nazareta, mwana Josefa. Ki yena Mesia ye lu bata.”

Cwale Ni utwa Natanaele ubulela kuli, “Cwale, Filipi, ha u si ka fita kale kwa mafelelezo, nji cwani?”

¹³¹ “Oh, batili. Kutokwa. Cwale tuhela ni ku bulelele. Wa ziba, lubile lubalanga Bibebe hamoho, mi ki sikamañi sa na bulezimupolofita ka za Mesia mwa ka bela?”

“U kaba Mupolofita.”

“Wa hupula muuna muhulu yani wa ndui ko no lekile litapi, yana sina tuto yeñata ya kuziba kuñola libizo la hae, ya bizwa Simoni?”

“Eehe. Uh-huh.”

¹³² “Na tile fa. Mi kana wa ziba? Yena Jesu wa Nazareta yo na mu bulelezi libizo la hae kuli ki Simoni, a cinca libizo la hae kuba Pitrosi, ili kutalusa ‘licwe lelinskyinyani’ ni ku mu bulelela ndata he.”

“Kihande,” ki hali—ki hali, “Ha ni zibi. Kana ku na ni sesinde se si kona kuzwa mwa Nazareta?”

¹³³ Mi ali, “Lu si ke lwa ambola sesiñwi ka sona; taha fela u to iponela.” Wani ki mulelo omunde, “Taha u to bona.”

Mi ki yo Filipi ataha, utisa Natanaele. Mi ha na ilo fita kwani, Jesu ni sepa na yemi, inza bulela, mwendi na sweli ku lapelela bakuli mwa mukoloko. Mi ha na fitile fo ne kuli Jesu, Jesu amu talima, mi ali, “Amubone mu Isilaele ya sina kaiñole ku yena.”

¹³⁴ Cwale, mu li, “Kihande, neli ka mwa na tinezi.” Oh, batili. Ba kwa upa kaufela ba tinanga ze swana. Hakulata na bile mu Siria, kamba yomuñwi fela; mulelu, liapalo.

¹³⁵ Ki hali, “Amubone mu Isilaele ya sina kaiñole ku yena,” mwa manzwi amañwi, “ya sepahala, muuna ya lukile.”

Kihande, sani ne si kakamalisize Natanaele. Mi ki hali, “Rabi,” ili ku talusa kuli, “muluti.” “Rabi, kana U ni zibile lili? Kikuli U zibile cwani kuli Ni Mujuda? Kana U zibile cwani kuli Na sepahala, ya sina kaiñole?”

¹³⁶ Yena ali, “Fani Filipi a si ka ku biza, ha ne usali mwatasako, Ni ku boni.” Uh! Limaili ze lishumi ni ze ketalizoho kwahule, neku leliñwi la naħa, lizazi la kwa mulaho.

Na bulezi sikamañi? “Rabi, Ki wena Mwana Mulimu. Wena u Mulena wa Isilaele!”

¹³⁷ Kono ne ku yemi baprisita bani fani, baba inuneka, baba ikangabeka, bali, “Muuna yo ki Baalezebubi, mauli.”

Jesu ali, “Na mi swalela ka seo.”

¹³⁸ Cwale, muhupule, ne ba si ka bulela ka kutumusa, kono ne ba bulezi mwa lipilu za bona. “Mi A lemuha mihipulo ya bona.” Yani ki niti. Sani kona se i bulela Bibebe. Mu si bize kuli ki *kuakaleza* haiba mwa lata, kono Yena—Yena a lemuha mihipulo ya bona.

¹³⁹ Mi A bulela kuli, “Na mi swalela ka seo. Kono zazi leliñwi Moya o Kenile ha u ka taha ku to eza lika ze swana ze,” kuya ka ku zamaya kwa Ona; “ku bulela linzwi la ku U lwanisa, hakuna ku swalelwa mwa lifasi le kamba lifasi le li taha.” Ki niti yeo nji? [Puteho ili, “Amen.”—Mu.] Cwale, bani beli Majuda.

Mi ka zazi leliñwi Na tokwa kuya kwa Samaria. Kono lu si ka eza kale seo, lu fumanu musali, kamba yena . . .

¹⁴⁰ Muuna, ya na kena mwa munyako o bizwa Bunde, kuli na folisizwe. Mi Jesu a ziba buino bwa hae, ni ku mu bulela kuli, “Nanula bulobalo bwa hao mi uye kwa hae.” Mi aeza cwalo, ni ku ba hande.

Mi lu fumana kuli, Majuda, babañwi ba ku bona ne ba Mu amuhezi. Babañwi ne ba lumezi; babañwi ne ba si ka lumela. Kiñi hane ba si ka lumela? Ne ba si ka lukisezwa kwa Bupilo. Ne ba si siemba sa mulelo wani.

¹⁴¹ Cwale muhupule, bani neli baprisita ni baana babatuna. Mi Jesu . . . Mu nahane ka baituti ba za litumelo bani ni baprisita, baana bo ne musike ku fumana mulatu mwa bupilo bwa bona. Jesu naize, “Mina muzwa ku ndata mina diabulosi, ni misebezi ya hae mwa ipaka.” Ali, “Kambe mu ba Mulimu, ne mu ka Ni lumela. Haiba ha mu Ni lumeli, mulumele ona—mulumele ona misebezi ye Ni eza; i paka Yo nili Yena.”

¹⁴² Cwale, Bibebe ibulezi cwana, kuli, “Jesu ki ya swana maabani, kacenu, ni kuyakuile.” Jesu naize, “Misebezi ye Ni eza ya lumela ku Na uka ieza ni yena.” Ki niti yeo? Mulemuhe, yani neli Melekisedeke wa niti cwale.

¹⁴³ Cwale mulemuhe, hape, neku nani masika amalalu fela a batu.

Mu ni utwile ha ni bulela kuli Ne nili mutu wa saluluti. Ni cwalo. Bakreste kaufela bana ni saluluti; isiñi saluluti sa mibala, kono saluluti ya moyo. Mubala wa litalo la mutu hauna sa kueza ni yena. Yena ki mwana Mulimu ka Kupepwa. Kono haili Mukreste, Mulimu na bulezi kuli, “A Mukauhane!” “Muzwe mwahala bona,” ni zeñwi cwalo. Yena ki wa saluluti, kwa masila, mwahala kuluka ni kufosa.

¹⁴⁴ Kono mulemuhe, neba na ni saluluti kwani, saluluti ka mibala, bani neli Masamaria.

Mi kuna ni fela masika amalalu a batu fa lifasi; haiba lu lumela Bibebe; bani ki, Kama, Sema, ni sicaba sa Jafeta. Bani ki bana ba bashimani babalalu ba Nuwe. Luna kufela lu zwelela ona kwani. Yani ki niti. Sani si eza luna kaufela ku simuluha ku Adama, si eza luna kaufela kuba mizwale. Bibebe i bulela kuli, "Ka mali alimañwi Mulimu u bupile linaha kaufela." Luna kaufela lu mizwale, ka mufuta wa mali. Mutu yo mansu wa kona kufa mukuwa mali a mwa mubili wa hae, kamba ku shutanisa. Mukuwa wakona kufa—kufa mu Japanese, mutu ya buñanda-talukeke, kamba mu Indian, muuna yo mu fubelu, kamba ufi kaufela, kamba wa mu Jafeta, kamba sika kaufela, wakona ku mufa mali a mwa mubili wa hae, kakuli luna kaufela lwa swana ka mali. Mubala wa litalo, ko lu pilile, halina za kueza ni zona.

Kono ha lu ketululwa, kona fo lu zwela mwa lifasi, sina mwa Na zuselize Isilaele mwa Egepita. Fani kona fo lu kauhanelia kwa lika za lifasi.

¹⁴⁵ Cwale, neli bo Kama, Sema, ni sicaba sa Jafeta. Mi kambe ne luna ni nako ya kufita mwa masika a kwa mulaho, nemuka bona mu Anglo-Saxon, kwa zwelela. Cwale, yani neli Majuda... Mu Samaria, ya nali siemba sesiñwi ki Majuda ni wa Macaba, bani ne ba nyalani ni Bamacaba ka likezo za Balami, ni Moabi. Nebali Masamaria. Mi ne kuna ni Majuda ni Bamacaba.

Cwale, luna ma Anglo-Saxon ne lu sina sa kueza ni sesiñwi sa zona. Ne lu si ka lumela ku Mesia ufi kaufela, kamba sika kaufela. Ne lu sa libeleti ni yomukana. Ne lu tisizwe mwateni kasamulaho.

Jesu na tezi Beili ba Hae, mi Beili ba Hae ha ba si ka Mu amuhela. Mi ki Hali kwa balutiwa ba Hae, "Musike mwa ya ka nzila ya Bamacaba, kono kanti muye kwa lingu ze latehile za Isilaele." Mi ki Ha ya fela kwa lingu ze latehile za Isilaele. Mi mutualime, Na i ponahalize Iliyena kuba Mwana mutu, fapila Majuda. Ne ba Li hanile.

Cwale, Masamaria, ka kuba siemba sesiñwi Majuda mi sesiñwi Bamacaba, neba lumela hape, mi ne ba libeleti Mesia.

Ne lu si cwalo. Neluli mahedeni, ni mabizo fa mukokoto ya luna, kuli lu lapela milimu; luna Bamacaba.

¹⁴⁶ Kono zazi leliñwi, Muhalalehi Joani 4, Nana ni swanelo ya kuya kwa Samaria, fa musipili wa Hae kuya kwa Jeriko. Kono naile kwa Samaria. Mi fani ha Na sweli kuya kwani, Na inzi fa siliba kwande a munzi wo bizwa Sikare. Mi siliba, haiba mukile mwaba kwani, ki pono ye katulusa nyana ye cwalo kwanu. Mi kuna ni liweluwelu la sicaba kaufela kwani, la mezi, ko kaufela bona ba tahanga. Mi basali ba taha kakusasana, ba lwala lindondo za bona za mezi, ni ku itwesa zona fa litoho, mi yeñwi inzi fa noka yeñwi, ni ku zamaya ni yona ka swanelo fela mo

ku lukela kubela, kusina ku sulula nihaiba ka loteli; ku bulela ku yomuñwi ni yomuñwi. Kacwalo, neba ka eza, batu ne ba ka zwela kwande.

¹⁴⁷ Kacwalo ye neli ka ilebene kiloko mwa musihali. Kacwalo A luma balutiwa ba Hae mwa munzi, ku yo leka lico, za kuca. Mi ha ne ba saile . . .

¹⁴⁸ Neku nani musali yana na ni kabubo kaka maswe. Mo ne lu ka mu bizeza, kacenu, musali wa lumonyi lolu fubelu, kamba lihule. Nana ni baana babañata hahulu. Kacwalo Jesu hana sa inzi fani, musali yo azwela kwande ka ilebene kiloko. Mwabona, na sa koni kuzwela kwande ni balanjo babañwi hane ba zwela teni kakusasana ku yo ka mezi abona; nana ni ku libeleta kufitela kaufela bona . . . Neba sa kopanangi sina mo ba ezezanga kacenu. Na zibahala cwalo. Kacwalo he, azwela kwande ku yo ka mezi, kacwalo ki ha nga ndondo ya kale, mi abeya liswalelo kwa sikiso, mi akala ku si nwelisa.

Autwa Yomuñwi inza li, "Musali, aku Ni tiseze kwa mezi." Cwale, muhupule, yo ki Melekisedeke. Yo ki Jesu, maabani, Mwana mutu.

¹⁴⁹ Mi atalima kafa ni kafa, mi abona Mujuda. Kacwalo musali ali, "Muñaka, ha ki swanelo kuli Mujuda akupe Musamaria sika kaufela. Na ni musali wa Musamaria, kacwalo U bulezi za sibaka sa Hao. No sa lukeli ku ni kupa sika se si cwalo. Haluna kutwano ku yomuñwi ni yomuñwi."

¹⁵⁰ Ki hali, "Kono kambe u zibile Ya bulela ku wena, no ka Ni kupa mezi."

Musali ali, "Cwale Uka ka cwani? Siliba si tungile, mi ha Una sikiso sa kuka ka sona."

¹⁵¹ Mi ali, "Mezi e Ni ka kufa ki Mezi a Bupilo, a ka buba Bupilo Bobusafeli."

A ambola ku yena kufitela A fumana buino bwa hae. Mi cwale ki . . . Mutualime sa Na mu bulelezi cwale, "Zamaya u yo biza muuna hao mutahe kwanu."

Mi musali ali, "Ha nina muuna."

¹⁵² Ki hali, "U bulezi niti, kakuli ubile ni ba ketalizoho, mi haili yopila ni yena cwale ha ki wa hao. Kacwalo, ka seo, ubulezi niti."

Mulemuhe shutano mwahala musali yani ni sishañata sa baprisita. Na ziba hahulu za Mulimu kufita sishañata sani sa baprisita mo ne ba zibela, ha lu ba beya hamoho.

¹⁵³ Musali ali, "Muñaka, Ni lemuha kuli U Mupolofita." Ki hali, "Halu sikaba ni alimuñwi ka myaha ye mianda yemine. Cwale, lu ziba kuli Mesia wa taha. Mi cwale Mesia ha sa tile, sani kona sa Ka eza." Sani neli sisupo sa Mesia, kakuli Na li Mwana mutu. Ali, "Sani kona Sa ka eza Ha sa tile. Wena u swanelo kuba mupolofita wa Hae."

¹⁵⁴ Mi sali, “Ki na Yena.” Hakuna mutu usili ya na ka bulela cwalo.

¹⁵⁵ Musali awisa ndondo ya mezi ni ku matela mwa munzi, mi ali, “A mu tahe, mu to bona Muuna Ya ni bulelezi ze Ni ezize. Kana yo ha yena Mesia nji?”

Cwale muhupule, Na sepisize kueza taba yeswana yani kwa mafelelezo a lusika lwa Bamacaba.

Majuda neba nani myaha ye likiti zene ya ku libelela Mesia, myaha ye likiti zene ya kuluta kuli Wa taha, ni sa Na ka eza ha Na ka be atile, mi ba palelwa ku Mu bona, kamba ku palelwa ku lemuha. Mi cwale ha Na itibahalize Iliyena mwa manzwi a Bibele luli Ana bulezi kuli Uka eza, fani ha Na li mwa bungeloi ni kutaha mwa nama ni ku to pila mwahala bona, ne ba palezwi ku li lemuha, ni ku biza misebezi ya Hae kuli ki ya diabulosi.

¹⁵⁶ Cwale lubile ni myaha ye likiti zepeli za kuluta, ku shetumuka cwalo mwa keleke ya Katolika ya Roma, kuya ka ba apositola. Kutuha fo lu taha ka ku shetumuka mwa Katolika ya Siroma, ma Gerike, ni zeñwi cwalo, kutaha cwalo mwa lusika lwa Luther, ni Wesley, ni babañwi kaufela, kutaha mwa likopano ze mianda ye ketalizoho ka yemine. Nebanani masika a kaufela, nze ba luta.

Cwale Na sepisize, ku si ka taha kale mafelelezo a nako, kuli siswaniso sa Sodoma ni Gomora si ka ba teni hape, “Sina mo ne kuinezi mwa mazazi a Sodoma, kona mo ku kabela kwa kutaha kwa nako ya maungulo, Mwana mutu uka i patulula Iliyena hape.” [Hakuna manzwi fa tepu—Mu.]

“Mwa nako nyana lifasi halina ku Ni bona ni hanyinyani; ibo mina mu ka Ni bona, kakuli Na,” ki tulokandina twa mutu, “Ni kaba ni mina, mane mwahala mina, kuisa kwa maungulo, mafelelezo a lifasi. Ni kaba ni mina.” Yena wa swana maabani, kacenu, ni kuyakuile. Mwa bona?

¹⁵⁷ Mwa bona, *Musamaria* yani, kaniti, kuzwa mwa kutazo yaka ya maabani busihu, neli Hagare, mwabona, ki mufuta o lyangani. *Mujuda* neli Sarah, kamba mushobo wa Sarah. Kono wa *Macaba* ki neli Maria, yona Peu ya Silena, Peu ya Silena ya Abrahama.

¹⁵⁸ Cwale ku sepisizwe kuli mwa mazazi a maungulo, kuli, yena Mulimu yaswana yo, yena Kreste yaswana yo, uka taha ku to ipatulula Iliyena sina Mwana mutu.

Kiñi? Ki ya swana maabani, kacenu, ni kuyakuile. Mi haiba Na ka tuhelela Majuda bani kuya ona cwalo, ni ku bafa sisupo sa Mesia, mi ni kutaha kwa mafelelezo a tuto ya Bamacaba ni ku tuhela fela kukena mwa lituto za bulapeli, Na kaba ya si ka luka. Una ni kueza taba yeswana, kakuli Bibele ibulezi kuli, mwa setin- . . . Maheberu 13:8, “Yena ki ya swana.”

Mi U sepe size mwa Malaki 4, ni Mañolo a shutana, kuli, mazazi a mafelelezo, keleke ikona kuina fela sina mo ibezi kacenu, ni lifasi mo ne li kabela.

¹⁵⁹ Mutualime lifasi kacenu. Mutualime fa buino bwa Sodoma. Mutualime fa zikinyeho ya lifasi mwa libaka ze shutana, ni lika ze sweli ku ezahala. Mutualime fa keleke ni busafa bo ikeni ku bona, wa Babilona. Mutualime mulumiwa wa lona, ki Oral Roberts ni bo Billy Graham.

G-r-a-h-a-m, nako yapili hane lu kuile lwa ba ni mulumiwa, kwa likeleke kaufela, wa libizo lene li fela ka h-a-m, sina Abraham. A-b-r-a-h-a-m ki litaku zesupa. G-r-a-h-a-m ki litaku ze silezi. Yena uka i? Kwa lifasi. Silezi ki nombolo ya mutu. Mutu na bupilwe ka lizazi la bu silezi. Kono supile ki nombolo ya Mulimu.

¹⁶⁰ Cwale mutualime ku bona kwani mwa Sodoma. Mi ki bani balumiwa ba bona kwani ba ambola ku bona.

Kono cwale ika i Peu yani ya Abrahama ya silena? Si kai sisupo sa bona, sa Na bulez? “Sina mo ne kuinezi mwa mazazi a Sodoma,” kuli Mulimu na tilefafasi mi na bonahalezi mwa nama ya butu, ni kubulela sa na nahana Sarah kwa mulaho mwa pilu ya hae, mwa tende kwa mulaho wa Hae, sisupo sa mafelelezo fani lifasi la Bamacaba li si ka sinyiwa kale ka mulilo. Mi Keleke ina ni sisupo sa yona sa mafelelezo fo lifasi kaufela li si ka sinyiwa kale, ona mubuso wa Bamacaba wo uka sinyiwa ka mulilo ni buhali bwa Mulimu. Kana mwa lumela sani? [Puteho ili, “Amen.”—Mu.]

¹⁶¹ Melekisedeke yani neli nama, na i ponahalize Iliyena mwa mubili wa butu; mi cwale kasamulaho A ezwa mwa nama. Mi cwale, busihu bwa kacenu, Ki ya swana, maabani, kacenu, ni kuyakuile. Kana mwa lumela cwalo? [Puteho ili, “Amen.”—Mu.]

¹⁶² Ki mañi Melekisedeke yo, cwale, yani ki ya swana maabani, kacenu... “Na sina ndatahe, na sina mahe; Yena na sina makalelo a mazazi, Na sina mafelelezo a bupilo.” Mi A katana Abrahama, mi ki sisupo sa mufuta mañi sa Na ezize? Mi cwale Ha na ezizwe nama, Na bulez kuli ne si ka kutela sani hape kusika taha kale mafelelezo a nako. Kana mwa lumela cwalo? [Puteho ili, “Amen.”—Mu.] Na si lumela. [“Amen.”]

Halu lapeleni.

¹⁶³ Mulimu Yomunde, Ni lumela Mañolo, a kuli No bulez kuli Wena “wa swana maabani, kacenu, ni kuyakuile.” Mi ka ku sepahala mwa pilu yaka, Mulena, Ni ziba kuli sesiñwi sibata ku ezahala. Hanikoni ku si talusa hande. Na saba kubulela sika kaufela, Mulena. Wena uziba pilu ya mutanga Hao.

¹⁶⁴ Mi ki linako ze kai, mwahala lusika hane U luma lika, sicaba ne si palelwa ku li utwa. Mutu u tundamenia ku lumba Mulimu ka Sa ezize, ni kubulela lika zetuna za Ka eza, kono ha lemuhi Sa

sweli kueza. Kona mo ku bezi mwahala masika. Ki kabakalañi keleke ya Roma hane i palezwi kubona Muhalalehi Patrick kuba mupolofita wa Mulimu? Kiñi hane ba bulaile Joan wa kwa Arc kanti nali mupolofita wa—wa musali, ba mu cisa sina muloi? Ndate, kamita ki za kwa mulaho. Wa li patelanga meeto aba ba butali ni ba ngana. Ki kabakaleo No bulezi kwa baprisita bani kuli, “Mu kabisa mabita a bapolofita, mi ki mina mu ba beile mwani.” Kasamulaho ha se baile, ba bona mafosisa a bona. Kamita ba Ku nyandisanga, Mulena, mwa mufuta kaufela O tahanga ka ona.

¹⁶⁵ Na lapela, busihu bwa kacenu, Mulimu, ka nako iliñwi hape. Kamuso lu lukela kuba kwa...ku ya kwa Tucson. Libaka zeñwi za lifasi, mileneñi yemiñwi lu swanelu ku yo kutaza teni. Kono, Mulimu Yomunde, kwa kona kuba baenyi mo busihu ba ba si ka...Ba utwile Linzwi ha li kutazwa, kono ha ba si ka Li bona ha li iponahaza.

Sina hane Ni mi buza kwa makalelo. Fani balutiwa ba, Kleopasi ni mulikana hae, hane ba zwa kwa Emausi, ne ba zamaya mwa nzila, mi Wena wa shomoka mwa mushitu ni ku kala ku ambola ni bona, kasamulaho wa zuho, wa kutaza ku bona. Kiñi, mi Ali, “Likuba, baba lipilu ze liyeha ku lumela. Kana ha mu zibi kuli Kreste na lukela kunyanda lika ze, mi akene mwa kanya ya Hae?” Kono niteni ne ba si ka lemuha. Musihali kaufela ne ba zamaile ni Wena, kono niteni ne ba si ka Ku ziba. Kono busihu bobuñwi...

Busihu bwa taha, ba Ku tundamena kuli ukene ni bona. Hane bakeni mwa macelo a lico ni kukwala likwalo, mi wabe Wa eza ka kuswana fela mo No ezelize sapili kusikaba kale kutakiswa kwa Hao, mi ba lemuha kuli neli Kreste yana zuhile. Mwa mizuzu ye likani No li kwa mulaho wa masila mi wa beuka. Kapili ba mata mi ba bulelela balutiwa bali, “Mulena ki niti u zuhile!”

¹⁶⁶ Ndate, Mulimu, Ni lumela kuli Wena u sa pila. Na ziba Wa pila. Mi U pakile ku luba ka linako zeñata hahulu. Kikuli ha Una ku lu ezeza zona hape ka nako ye, Mulena? Haiba lu fumana muhau mwa meeto a Hao, ha u tahe ka yona nako ye hape. Na ni mutanga Hao; ba ki batanga ba Hao mo. Mulena, kaufela ze Ni bulezi halina kuba ni... Linzwi lililiñwi fela lelizwa ku Wena la kona kuba leliñata mwa masihu a ketalizoho aa, kamba mañusa a ketalizoho. Ne li ka likana, linzwi lililiñwi fela kuzwa ku Wena. Kana ha Una ku bulela, Mulena, kuli sicaba si kone ku ziba kuli Ni ba bulelezi Niti? Lumeleza sani, Mulimu. Na li kupa ka Libizo la Jesu, ka nako ye hape. Amen.

¹⁶⁷ Cwale, Ha ni mi zibi. Ni ziba batu babañwi baba likani. Ni ziba mushimani yo yainzi *fa*. Ni ziba Bill Dauch yainzi *fani*. Ni bata ku... Kiyo *fa* Muzwale Blair, Rodney Cox. Ku tata ku bona kwa neku lani.

Kwa neku *le*, ona ka nako ye Ha ni koni kubona mutu kaufela, kaniti, zeo Na li ziba.

¹⁶⁸ Cwale ki babakai mwahali mo bao Ni li muenyi ku mina? Mu nanule mazoho a mina, baba ziba kuli hakuna se Ni ziba ka mina, munanule mazoho a mina kwa maneku amabeli kaufela.

Ki babakai mwahali mo babana ni se si fosahalile, kamba sika se mu ziba kuli Na ha ni hakuna se ni ziba ka sona? Mu nanule mazoho a mina.

Cwale, ku kona kuba luli, luli mane ha ku konahali kuziba sesiñwi ka mina. Ku si cwalo, kanti, si lukela kuzwa kwa sinulo ya Moya.

Mi kakuli Ni mi bulelezi mwa masihu a kamukana, ni busihu bo, kuli Ha si ka shwa; Uteni mo, mi usepisize kueza nto ye swana. Mi usepisize kuli ku ka taha nako mwa mazazi a maungulo, kuya ka Malaki 4 ni kuya ka Muhalalehi Luka, kuli Uka bonahala hape mwa mufuta wa butu mwahala sicaba sa Hae ni ku to eza lika ze swana, ni ku to patulula lika zeswana, sona sisupo sesiswana sa Mesia. Ki babakai baba ziba cwalo, mina babali ba Bibebe, baba ziba kuli ki Niti yeo? Muli, “Amen.” [Puteho ili, “Amen.”—Mu.] Kaufela mina muswanela kuba babali ba Bibebe.

¹⁶⁹ Cwale, Ni ziba kuli ki za buenyi kwa sicaba kacenu, kono niteni ki Niti. Lani kona libaka ha ne ba sa zibi Jesu wa Nazareta. Ne ba ziba lituto za milapelo ya likeleke za bona, kono ne ba sa Mu zibi. Kono Na tile fela sina Bibebe mo ne i bulelezi; isiñi muituti wa za bulapeli, isiñi muprisita. Natile sina Mupolofita, mi ba Hae Luli neba si ka Mu amuhela.

¹⁷⁰ Cwale, haiba Mulimu uka buluka Linzwi la Hae, mi haiba Ni kona ku... si wela ku yomuñwi yo Ni ziba, konakuli Ni ka—Ni ka nga fela usili. Mwabona, Ni bata mutu yo Ni sa zibi. Mi Ni bata kuli mu lapele.

¹⁷¹ Cwale, mutualime, ne kuna ni musali yomunyinyani nako yeñwi yana kula. Na sa sinyize masheleñi a hae kwa baalafi; ne ba si ka mu tusa. Mi ki hali mwa pilu ya hae, “Kambe Ne ni ka swala fela liapalo za Muuna yani, Ne ni ka foliswa.” Mwa hupula likande lani? Mi kacwalo kaufela bona balika ku mu bulelela kuli aitulele fela, kono musali aikataza inza shela konji mane a yo swala mungundo wa sapalo sa Hae, akuta mi ayoina fafasi.

¹⁷² Cwale muiteeleze ka swanelo. Mi cwale ha Na ezize sani, mi cwale musali hana ezize sani, Jesu afetuha ni kubulela kuli, “Ki mañi ya Ni sweli?”

¹⁷³ Kiñi, Pitrosi ni ba apositola ba Mu omanya. Hakulata mwendi na bulezi kuli, “Mulena, usike wa bulela nto yecwalo. Sicaba si ka nahana kuli kuna ni se si fosahalile ni Wena. Kakuli, ha No ba kupile kuli ca nama ya Hao ni kunwa Mali a Hao, ne ba

nahanile kuli kuna ni se si fosahalile. Mi Wena uli, ‘Ki mañi ya Ni sweli?’ Kiñi, nyangela kaufela basweli ba Ku swala.’¹⁷⁴

¹⁷⁴ Mi ali, “Eehe, kono Ni lemuha kuli mata azwile ku Na.” Wani neli muswalelo o shutana. Cwale, mutu kaufela wa ziba kuli *mata* ani ki “kutiya.” “Ni fokozi; mata a zwile ku Na.”

Mi A talima kwa ni kwa mwahala sicaba kufitela Ha fumana musali yomunyinyani yani, mi a mu bulelela kaza butata bwa hae bwa mali. Mi musali aikutwa mwa mubili wa hae kuli butata bwa mweya bwani butuhezi. Ki niti yeo? Mi cwale Ali, “Tumelo ya hao i ku pilisize.”

Cwale, linzwi la si Gerike fo ki kuli *sozo*, leli talusa hande kuli “kupiliswa,” ka nama kamba ka moyo, ka kuswana fela. Na “pilisize.” Yena ki—Yena ki Mupulusi wa hao.

¹⁷⁵ Cwale, haiba nji yani neli Yena maabani, ni ka mwa Na ezelize, ku bonisa kuli Nali mwahala sicaba, yena Mesia yana sepisizwe; mi yani kona nzila ya Na itibahalize Iliyena, ni kusepisa ka Bibebe, kuli Na ka eza ze swana ni cwale; nji Na sike kueza sani, kikuli Ha lukeli kueza ze swana?

¹⁷⁶ Mu li, “Kana Na bulezi za kufolisa bakuli nji?” Eehe!

Maheberu, Bibebe ye Ni sa zo bala fela, ibulezi kuli, “Jesu Kreste ki yena Muprisita wa luna Yomutuna ya kona kuswaliwa ka maikuto a matuku a luna.” Ki babakai baba ziba kuli yani ki niti? [Puteho ili, “Amen.”—Mu.] Bibebe ibulezi cwaloo. “Ki yensa Muprisita Yomutuna cwale ya kona ku swalawa ka maikuto a makulano aluna.” Cwale haiba Yena ki Muprisita Yomutuna ya swana Ya naliteni ka nako yani, cwale Na ka eza cwani ka nako ye? Na ka eza ka nzila ye swana sina mwa Na ezelize nako yani, haiba nji Ki Muprisita Yomutuna ya swana. Cwale, mwa kona . . .

Na ha ki Na Muprisita Yomutuna wa mina. Mwakona ku ni swala, mi ikona fela kuba sina kuswala bo muuna mina, kamba muzwale wa mina, kamba yomuñwi kaufela, yali muuna.

¹⁷⁷ Kono mutuhele tumelo ya mina iswale Yena, mi mubone se si ka ezahala. Cwale, haiba Ni mutanga Mulimu mi ni mi bulelezi Niti, Mulimu uka paka sani kuba Niti. Mi sani si ka paka kuli Jesu Kreste wa pila busihu bo, uyemi mo. Kana ki niti yeo? [Puteho ili, “Amen.”—Mu.]

Cwale, mube ni tumelo, ka neku lililiñwi fela, neku leliñwi. Mube ni tumelo kwande kafoo. Kihande Ni inele kwa maikulofoni kwanu, kakuli habakoni kuni utwa.

¹⁷⁸ Yomuñwi atalime fela ku Mulimu, ni kubulela kuli, “Mulimu, muuna yani ha ni zibi. Hakuna sa ziba ka na. Na ni muenyi ku yena ka kutala. Kono tuhela kuli tumelo yaka i swale Wena, Mulena. Mi Wena wa ziba se sili butata bwaka, Mulena. Wena wa ziba za ka kaufela. Wa ziba yo Ni li yena, ona cwaloo fela mo No zibela Pitrosi mwa na inezi, sina mo No zibezi Natanaele, sina

ha No ziba sene si fosahalile ku musali yani wa taba ya mweya. Mi muuna yo u ni bulelala kuli Wena u ‘ya swana maabani, kacenu, ni kuyakuile.’ Konakuli, Mulena, tuhela kuli tumelo ya ka iswale Wena.”

Mi haiba Uka eza sani, ni iponahaza Iliyena kwanu, ki babakai ba mina baba ka Mu lumela ka lipilu za mina kaufela; haiba Uka eza cwalo mwendi ku alimuñwi, kamba habeli, kamba kwa batu babalalu, ili kuba—ili kuba bupaki? [Puteho ili, “Amen.”—Mu.] Mulimu ami fuyole.

¹⁷⁹ Cwale, Ndate Mulimu, se ka kusepahala hasiyo mwa mazoho a mutu ufi kaufela. I lukela kuba kezahalo ye ipitezi. Kacwalo Ni lapela kuli U ni tuse cwale, Mulena. Ni mwa mazoho a Hao. Eza ni na ka Mo bonela kulikana. Ka Libizo la Jesu. Amen.

¹⁸⁰ Cwale, musike mwa ikalelwa. Ka buikokobezo fela, ka likute muli, “Mulena, Ni ka Ku sebeleza. Mi yani ikaba niti, kuli, haiba Ni kona kuswala sapalo sa Hao, konakuli uka bulela hape ka yena muuna yani. Sani si ka paka ku na kuli sa bulezi ki sa Niti.” Ki niti nji?

¹⁸¹ Ki babakai baba boni fateni siswaniso sa Liseli lani? Si fumaneha mwa naaha kaufela, kai ni kai. Sayansi i si ngile ni ku si tatuba, mi kai ni kai. Cwale, Yena uteni ona mo cwale; yena yaswana Yana bulezi ka za *Linyalo Ni Telekano*, ya swana Yana li fa lilundu, yana nyanganyize malundu kwa mulaho kwani, yena yaswana Yani ya nainzi kwanu kwa nuka mwa ’33, yena yaswana maabani, kacenu, ni kuyakuile. Ki ya swana.

¹⁸² Cwale, ki yani musali, mi wa lemuha cwale kuli sesiñwi si ezahalile. Liseli lani lisweli ku lepelela fahalimu a hae. Uikinezi ona fa *kwanu*, ni sweta ya mubata o tala, kamba sesiñwi. Hani mu zibi musali yo. Ni lumela kuli lu baenyi ku yomuñwi ni yomuñwi. Yani ki niti. Kana wa lumela kuli Mulimu . . . Wena—wena u tokwile nto yeñwi, mi wa lumela kuli Mulimu wa kona ku patulula ku na butata bwa hao? Mi haiba Aeza, konakuli uzibe kuli ikona kuba mata a ipitezzi, kakuli Na ha ni ku zibi. Mi seo si lukela kutaha ka mukwa wa buipiteli.

Kuitingile ka so nahana. Wa kona kunga siemba ni baprisita, ku si biza kuli “ki diabulosi,” kamba wa kona kunga siemba ni mulumeli ni ku si biza kuli ki “Mulimu.” Kaufela mo uka lumelela, kona ko ku ka zwa mupuzo wa hao.

¹⁸³ Haiba nji Mulimu uka patulula kuna butata bwa hao, kikuli uka Mu amuhela kuba—kuba swalelo ya butata bo nji? Na hani zibi butata bwatensi. Kono Na ziba, mi ni wena wa ziba, kuli kuna ni se si ezahala.

¹⁸⁴ Cwale, cwale tuhela fela ni ku bulelele mo uikutwela, mi kipeto uka ziba; uitwa kufutumala luli, bunde, maikuto amande luli. Ni talimela ku Sona ona fa cwale. Kona Liseli lani, Liseli leli fubelu ku yena musali.

Mi kalibe yo ukatazwa ki butata bwa mwa mba. Ki sika se si melile, cwalo, mwa mba ya hae. Ha ki wa kwanu. [Kezeli uli eeni, “Ki niti.”—Mu.] Batili. U zwelela kwahule nji cwani? Yani ki niti. U zwelela kwa Wisconsin. Ki nit yeo nji? Luli. Cwale u folisizwe. Tumelo ya hao i ku folisize.

¹⁸⁵ Cwale mu ni bulelele Yo musali na sweli? Ni yemi kwahule ka liñokolwa ze twenti-faifi kuzwa ku yena. U sweli Jesu Kreste, yena Muprisita Yomutuna. Kana mwa lumela cwalo? [Puteho ili, “Amen.”—Mu.]

¹⁸⁶ Ni talimezi musali ye ne Ni ambola ni yena. Musali yo, Ni sweli ku mu talimela ona fa, kakuli usweli ku lapelela muuna katata luli. Uni bulelezi kuli nana ni muuna... Hakuna sa ni bulelezi ka zona.

Kono libizo la hae musali yo ki Musala bo Waldrop. Uzwelela kwa Phoenix. Na zusizwe kwa bafu, mi mualafi wa hae natile ni pampili ya x-rei ye bonisa kansa mwa pilu. Na shwezi mwa mukoloko wa litapelo. Seli kufitile nako yekuma kai, Musala bo Waldrop? Myaha ye eitini kwamulaho, mi ki yani uinzi fale busihu bwa kacenu, bupaki bo bu pila. Mualafi wa hae utile kwa mukopano, na tisize... Ali, “Kana musali yo ukona ku pila cwani?” Kono ki yani fale, mi hakuna nihaiba sisupo sa yona.

¹⁸⁷ Urtisize yomuñwi, mi usweli ku mu lapelela. Cwale, wa shwa, ka butuku bwa shuka. Cwale, zeo Na li ziba. Kono kakuli wa lapela... Mwa ziba ha Ni zibi kuli ki mañi yani, Musala bo Waldrop.

¹⁸⁸ Yena uzwelela kwa Missouri, mi libizo la hae ki Muunamuhulu Cooper. Yani ki niti. Cwale, wa lumela, wa kna kuya kwa hae mi ube hande, muñaka. Ku itingile ku wena, haiba nji wa si lumela.

¹⁸⁹ Ki yo fa musali, mi usweli ku katazwa ki butuku bwa maswafu kufipelwa, makulano. Ha ki wa kwanu. U ikinezi kwani mwahala sicaba, ona kwande *kwani*. Na sepa wa utwa... Musali yo hazwi kwanu. Uzwelela kwa Georgia. Kalibe wa bo McKenny. Kikuli wa lumela ka pilu ya hao kaufela, ni ku lumela kuli Mulimu uka kufolisa? Yema he kanti, haiba u muenyi ku na mi yeo ki niti. Jesu Kreste wa ku folisa. Kana wa lumela?

[Muzwale Branham ufulalela kwa kopano—Mu.]

¹⁹⁰ Kwa mukokoto wa ka, kuna ni muuna yainzi kwa mulaho wa ka. U sweli ku ikambota ni Mulimu. Mi ubata sikamañi; una ni mbututu yana ni butata bwa pilu. Mi mbututu yani una ni butuku bwa mulumo wa mali a misinga ya mwa pilu, kona mo ba bulelezi baalafi. Mi libizo la baana ba ki Bo Cox. Amu yeme, Bo Cox. “Mi Na bulelezi Sarah sa na sweli kunahana, kwa mulaho wa Hae.”

[Muzwale Branham uzwelapili ku fulalela kopano—Mu.]

¹⁹¹ Kwa buse bwa sibaka mwa kufita ku yena kwani, kwa muhalo nyana kafo, kuna ni muuna ya sa zweeli kwani, kono uzwa kwa New Mexico. Nali kuba ni mu bone fateni, mwa bupilo bwaka. Ni sweli ku mu talima ona fa, mi uinzi kwa mulaho wa ka. U zwelela kwa New Mexico. Mi muuna yo kuna ni musizana ya tabela, mi musizana una ni se si fosahalile mwa mulomo wa hae. Ki... Ku sa tabela kuca mwa mulomo wa hae kona ze fosahalile. Mi libizo la muuna yo ki Bo West. Kana mwakona kuyema, muñaka. Na ni muenyi luli ku yena, kono Mulena Mulimu uka folisa mwana hae.

¹⁹² Kana mwa lumela cwale ka lipilu za mina kaufela? [Puteho ili, "Amen."—Mu.] Ki babakai ba mina baba lumela cwale ka lipilu za mina kaufela? ["Amen."] Cwale, kana Jesu Kreste ha ki ya swana maabani, kacenu, ni kuyakuile? ["Amen."] Kikuli mwa Mu amuhela kuba Mupulusi wa mina? Munanule mazoho a mina. ["Amen."] Mwa Mu lumela kuba Mufolisi wa mina? ["Amen."]

¹⁹³ Kwanu, kuna ni mutu ya inzi fa, ki sihole kamba taba yeñwi, ulobezi fa kambeta.

Kana mwa ni utwa mwa maiki ye nji? [Muzwale Branham ulwala maikulofoni ni kuzamaya kuya kwa mafelelezo a katala mi ubulela ni musali fa kambeta—Mu.] Ha ni ku zibi wena. Wena u musali fela ya lobezi foo. Kambe Na kona kuku folisa, Ne ni ka eza cwalo. Hanikoni kuku folisa.

[Muuna ukalisa kulila—Mu.] Ku lukile. Ki muuna fela yasweli ku nyakalala. Mwana hae ufolisizwe.

Ha ni ku zibi wena. Wena u musali, mi Na ni muuna. Ye kona nako yapili ha lu kopana fateni mwa bupilo, Na sepa. Sicaba se...?...baba ku tisize. Ka niti, ye ki nako ya hao yapili kwanu; kona ba sa zo ku tisa mwahali. U zwelela kwahule hahulu. U apesizwe ki muluti wa lifu. Una ni kansa. Ha ki buyanga. Ki kansa. Baalafi habakoni kuku tusa ni hanyinyani. Ki niti. Mi uziba kuli wa shwa; baalafi bani hakuna se ba kona ku kuezeza.

¹⁹⁴ Nako yeñwi nekuna ni ba mbingwa babalalu fa munyako wa Samaria. Mi ba mbingwa bani bali, "Kiñi ze luka inela fa kufitela lushwa?" Kakuli, matuku kaufela, ku bulaiwa ki tala, ni kuca bana ba yomuñwi ni yomuñwi. Mi bali, "Haiba luya kwa mafulo a lila, bona ma Asiria; haiba ba ka lu bulaya, lu ka shwa, nihakuli cwalo. Mi haiba ba ka lu pilisa, lu ka pila." Mi se ba inga kolo yani. Mi, ka tumelo yani, ne ba si ka ipilisa fela bona bañi kono ni sikhwata kaufela.

¹⁹⁵ Cwale, uka shwa haiba u lobala ona fo. Kono ha u kupiwi kuli uye kwa mafulo a sila. Kono umemilwe kuya kwa ndu ya Ndate,...?...

¹⁹⁶ Wa shwa kwa kansa. Ha ukoni kupila kwanda Mulimu. Wena ha uzwi mwa muleneñi wo. Ha uenzeleli fa bukaufi kwanu. U zwelela kwahule. U zwa kwa Milwaukee. Yani ki niti. Yani ki niti. Ni boni muleneñi. Na ziba cwalo. Yani ki niti.

Kana wa lumela? Kikuli uka amuhela Mulimu cwale kuba Mufolisi wa hao? Haiba ku cwalo, hakuna taba ka mo fokolezi, mo bezi nako yetelele mwa mumbeta, Na lumela, mwa buino bwa hao, Ne ni ka nanuha ka Libizo la Jesu Kreste. Cwale nanula kambeta kao mi uye kwa ndu, mi upile kwa kanya ya Mulimu. Kikuli uka ni utwela, kuba mupolofita wa Mulimu? Konakuli yema mi uzamaye. U foliswe! Usike wa saba. Zuha fa kambeta; Mulimu uka ku folisa. Mwabona?

¹⁹⁷ Yomuñwi amu swale kuli ananuhe mi abe ni mata. Kana mwa lumela Mulimu? Mu mutuhele fela abe ni mata nyana; ukaba hande. Ku felile, kezeli. Ki yani fani, ka Libizo la Mulena Jesu! [Puteho ya nyakalala kakuli kezeli cwale uyemi—Mu.]

Halu yemeñi mi lufe tumbo ku Mulimu. Ki ya swana maabani, kacenu, ni kuyakuile! [Puteho ya nyakalala hakalo ni kulumba Mulimu—Mu.] 

Zamaya, mi Mulena Jesu Kreste a ku fuyole. Ube hande. [Puteho i zwelapili ku nyakalala ni kulumba Mulimu—Mu.] 

KI MAÑI YO MELEKISEDEKE? LOZ65-0221E
(Who Is This Melchisedec?)

Liñusa le ka Muzwale William Marrion Branham ne li katalizwe lwa pili mwa Sikuwa la Sunda manzibwana, Yowa 21, 1965, ili fa Parkview Junior High School mwa Jeffersonville, Indiana, U.S.A., liingilwe kuzwa fa tepu ya magesi ya manzwi kusina ku zusa sika mwateni ku ya Sikuwa. Toloko ye ya mwa Silozi ne i hatisizwe ni kuhasanyiwa ki ba Voice Of God Recordings.

LOZI

©2017 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitusiswe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangelí ya Jesu Kreste. Buka ye hailekiswi, kuatiswa mwa buńata, ku nepelwa fa moyá wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa masheleńi ku sina tumelelano niba Voice Of God Recordings®.

Ka litaba zeńata kamba ka libuka zeńwi ze liteni, shangwe muńolele kwa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org